

## سنت مرقس رو شاستر

### تعارف

سنت مرقس آي شاستر اندازن سن 50 شون 60 عيسوي ري بچ ۾ روم ملڪ شون لکيو هتو. سنت مرقس رو پورو نون يوحنا مرقس هتو. اوتھي

سنت پولوس هان برنباس پيٽرو ملي پرچار رو كوم ڪيو هتو. سنت مرقس شروع ۾ پرچار ري كوم ۾ سنت پطرس پيٽرو پي هتو هان جڪو باتون

پطرس پرچار ري تيم منڪون ني شتوتوم سنت مرقس او باتون ياد راکي. دانا منڪون ري خيال ۾ اي شاستر متي ري شاستر لوقا ري شاستر هان

يوحنا ري شاستر شون پيل لکيوڙو هي.

سنت مرقس ايني شاستر ۾ پريو يسوع ري شيڪايوڙي باتون شون نال وڌيڪ پرچون ري باري ۾ لکيو هي. سنت مرقس اي پي لکيو ڪه پريو

يسوع رو شجون شون موتو هان قدرت آلو پرچو يعني اوتھي رو ڏک ڏيڪڻ، موت هان مونوڙون شون جيتو هوڻ هي. پريو يسوع ري باتون هان پرچا

ايئي باتون رو ثبوت هي ڪه او شاجيلي ايشور رو ڏيڪرو هي.

### خاص مضمون

پويتر سنون ڏيون آئي يوحنا رو پرچار . . . . . 13-1:1

پريو يسوع رو گليل صوبي ۾ پرچار . . . . . 50:9-14:1

پريو يسوع رو يروشلم شهر ڏيما جاوڻ . . . . . 37:13-1:11

پريو يسوع ني جهالڻ هان اوتھي ري موت . . . . . 47:15-1:14

پريو يسوع رو مونوڙون شون جيتو هوڻ . . . . . 8-1:16

پريو يسوع را درشن هان آڪاش تي جاوڻ . . . . . 20-9:16

پوئتر سنون ڏيوڻ آڻي يوحنا رو پرچار

(متي 12-1:3؛ لوقا 18-1:3؛ يوحنا 19:1-28)

1 آي ايشور ري ڏيڪري يسوع مسيح ري باري ۾ خوشي ري خبر ري شروعات هي. 2 جون يسعياھ نبي ري شاستر ۾ ايشور ڪهيو هتو ڪم، ”هون آڀرو نياپو ڏيوڻ آڻو ٿي شون پيل ميلين-“

او تاري اوڻ شون پيل ٿارو مارگ تيار ڪرشي-

3 رڻ پت ۾ پرچار ڪرڻ آڻي رو هيلو شنجي پڙيو

ڪم، ’پرميشور ري شارو مارگ تيار ڪرو

هان اوئي ري شارو مارگ ڏندو ڪرو-“

4 ايڻي ري ڪري پوئتر سنون ڏيوڻ آڻو يوحنا رڻ پت ۾ آيو هان منڪون ۾ پرچار ڪرڻ لاگو ڪم، ”تي آڀري پاپون شون توبهون ڪرو هان پوئتر سنون

ليئو، تو ايشور ٿورا پاپ معاف ڪرشي-“ 5 يروشلم شهر پڻ پوري يهوديا علائقي را شجائي منڪ پوئتر سنون ڏيوڻ آڻي يوحنا ڪيڊي اوڻ لاڳام، اوئون

شجي منڪون ري روبرو آڀرا پاپ منيا هان يردن دريا ۾ اوئي شون پوئتر سنون ليوڻ لاڳا. 6 يوحنا اونٽ ري بائون را ناهيوڙا گاپا پيرتو هان ڪليون تي

چوڙي رو پتو بوندتو- او تيد هان جهنگ ري ماڪي ڪاوتو- 7 او آي پرچار ڪرتو ڪم، ”مهني شون پچي هيڪ اهڙو منڪ اوڻ آڻو هي جڪو مهني

شون وڌيڪ قدرت آڻو هي، هون ايڻي جهڙو پي ڪونهي ڪه نوڙي اوئي ري جتي را ڪشا ڪولون- 8 هون تو رگو پوئي شون پوئتر سنون ڏيون هون پڻ

او توئي پوئتر آتما شون پوئتر سنون ڏيشي-“

پڙيو يسوع رو پوئتر سنون هان آزموتو

(متي 17-13:3، 11-1:4؛ لوقا 22-21:3، 13-1:4)

9 اوئون ڏنون ۾ جڏي منڪ يوحنا شون پوئتر سنون ليتا پڙيا، تو پڙيو يسوع گليل صوبي ري ناصرت شهر شون آيو هان يردن دريا ۾ يوحنا شون پوئتر

سنون ليئو- 10 جڏي پڙيو يسوع پوئتر سنون لي پوئي شون باهر نڪريو، تو اوئي آڪاش ني ڪليوڙو هان پوئتر آتما ني ڪوتو آڻي ڪار آڀ ماڻي اترتي

ڏينو- 11 پچي آڪاش شون آواز آيو ڪم، ”تو مهارو بيارو ڏيڪرو هي، ٿي شون هون تموم گهڻو خوش هون-“

12 پچي پوئتر آتما پڙيو يسوع ني اوئيج تيم رڻ پت ۾ مليو- 13 پچي او چاليه ڏن هان چاليه راتون رڻ پت ۾ رهيو هان شيطون اوئي ني آزماوتو رهيو-

او جهنگلي جنارون پڙيو رهيو هان فريشتا اوئي ري شيوا ڪرتا رهيا-

پريو يسوع رو چار مهوٽون ني هيلو ڪرڻ

(متي 22-18:4؛ لوقا 11-1:5)

14 پويتر سنون ڏيوڻ آئي يوحنا ني جيل ۾ گهاتڻ شون پڇي پريو يسوع گليل صوبي ۾ گيو هان منڪون ني ايشور ري خوشي ري خبر سٿاڻ لاگو ڪم.

15 ”ٽيم پورو هيو رو هان ايشور ري بادشاهي نيڙي آئي ري ايڻي ري ڪري آڀري پاپون شون توبهون ڪرو هان ايڻي خوشي ري خبر تي وشواس راکو.“

16 هيڪ ڏن جڏي پريو يسوع گليل ڊنڊ ري ڪپ تي جاوتو پڙيوم، تو اوني بيئون مهوٽون ني ڊنڊ ۾ جال هڻتي ڏينا. ائون ۾ هيڪ شمعون هان اوني رو پائي اندرياس هتو. 17 پريو يسوع ائون ني هيلو ڪري ڪهيو ڪم، ”آئو مهاري لاري بوم، تو هون توني شيڪائين ڪه تي مڇي پيڙي ڪرڻ ري جگها مهاري شارو منڪ پيڙا ڪرو ڪه او مهارا چيلا هوڙي.“ 18 اي شئي ائون آڀرا جال اچلائي چوڙيا هان پريو يسوع لاري بيون لاگا.

19 پڇي پريو يسوع اوت شون ٿوڙو آگهي گيو، تو اوني زبدي ري بيئون ڏيڪرون، يعقوب هان يوحنا ني ڏينا جڪو پيڙي ۾ آڀرا ٿوتوڙا جال ناوتا پڙيا.

20 پريو يسوع ائون ني يڪدم هيلو ڪيئو، تو او پي آڀري باب زبدي ني پيڙي ۾ مڙورون پيڙو چوڙي اوني لاري بيون لاگا.

پريو يسوع رو منڪ شون پوت ڪاڍڻ

(لوقا 37-31:4)

21 پڇي پريو يسوع آڀري چيلون پيڙو ڪفرنحوم شهر ۾ گيو هان جڏي چنچر يعني پويتر ڏن آيو، تو او جائي پگتي گهر ۾ شيڪاڻ لاگو. 22 اوني ري باتون شئي شجائي منڪ حيرون هتا ڪيونڪه او ڌرمي گروئون آئي ڪار نام، پڻ اختياري شون شيڪاوتو.

23 اوني ٽيم پگتي گهر ۾ هيڪ اهڙو منڪ آيو جڪي ني پوت لاگوڙو هتو. اوني رڙ ڪري ڪهيو ڪم، 24 ”اي يسوع ناصر، تارو مهون شون ڪهڙو واسطو؟ ڪي تو مهوني مٿاڻ آيو هي؟ مهوني خبر هي ڪه تو ڪڻ هي. تو اوج ايشور ري طرفون آيوڙو پويتر هستي هي.“ 25 پريو يسوع پوت ني ڌڙڪو ڏي ڪهيو ڪم، ”ماٺ ڪر. ايڻي شون نڪري جا.“ 26 پڇي پوت اوني منڪ ني مروڙيو هان زور شون رڙ ڪري اوني شون نڪري گيو.

27 اي جوئي شجائي منڪ تموم گهڻا حيرون هويا هان آڀت ۾ ڪيوڻ لاگا ڪم، ”اي ڪي هي؟ اي تو نوني بات هي ڪه او پوتون ني اختياري شون حڪم ڏي هي هان او پي اوني رو حڪم مني هي.“ 28 ايڻي نموني پريو يسوع يڪدم گليل ري شجي علائقي ۾ مشهور هوئي گيو.

پريو يسوع رو تموم گهڻا منڪ شاجا ڪرڻ

(متي 17-14:8؛ لوقا 41-38:4)

29 پگتي گهر شون نڪري پريو يسوع يعقوب هان يوحنا پيڙو ڏيو شمعون هان اندرياس ري گهري گيو. 30 اوني ٽيم شمعون ري شاشو ني تموم گهڻو تا هتو، ايڻي ري ڪري ائون آوتني پريو يسوع ني اوني ري باري ۾ سٿايو. 31 پريو يسوع اوني ڪيڊي گيو هان اوني رو هات جهالي اٺالي، تو اوني رو تا اٺري گيو هان او ائون ري شارو شيڏو ڪرڻ لاڳي.

32 ڏن آئونئون شون پڇي منڪ، بيمار هان پوت لاڳوڙا منڪ پريو يسوع ڪڍي لي آيا. 33 اترې توتې ڪه شجو شهر اوتې گهر ري در تي آئي پيڙو هويو. 34 پريو يسوع تموم گهڻا بيمار شاجا ڪيئا جڪون ۾ نمونې نمونې ري بيماري هتي هان تموم گهڻا پوت ڪاڍيا. پڻ پوتون ني بولڻ ڪونهي ڏينا ڪيونڪه او اوتې ني اولڪتا.

پريو يسوع رو گليل صوبي ۾ پرچار

(لوقا 4:42-44)

35 شاڪلي تارهي مونداري رو پريو يسوع اُنيو هان هيڪلپائي جگها ۾ جائي پراتنا ڪرڻ لاڳو. 36 پڇي شمعون هان اوتې را ساڻي پريو يسوع ني جوڻو ڪيا. 37 جڏي اوتون ني پريو يسوع لاذوم تو او ڪيوڻ لاڳا ڪم، ”شجائي منڪ توني جوئي پڙيا.“ 38 پريو يسوع اوتون ني ڪهيو ڪم، ”هالو، آبي ڪي آشي پاشي ري گون ۾ هالون ڪه اوڻ پي پرچار رو ڪوم ڪرون ڪيونڪه هون ايئي ڪوم ري شارو جگت ۾ آيو هون.“ 39 ايئي نمونې پريو يسوع شجي گليل علائقي ۾ يهوديون ري پگتي گهرون ۾ جائي پرچار ڪرڻ لاڳو هان منڪون ۾ پوت ڪاڍتو رهيو.

پريو يسوع رو ڪوڙهي ني شاجو ڪرڻ

(متي 8:1-4؛ لوقا 5:12-16)

40 پڇي هيڪ ڪوڙهيو پريو يسوع ڪڍي آيو هان اوتې ري پگون ۾ ڪري ڪيوڻ لاڳو ڪم، ”جي تونري مرضي هووي، تو مهني ايئي بيماري شون شاجو ڪري آچو اوچلو ڪرو.“ 41 پريو يسوع ني دايا آئي هان اوتې ڏيشا آيو هات ٻڌائي اوتې ني هات لگائي ڪهيو ڪم، ”بيشڪ مهاري مرضي هي ڪه تو ايئي بيماري شون شاجو هو.“ 42 تو اوتيج تيم اوتې ري ڪوڙه متي گئي هان او شاجو هويو. 43 پريو يسوع اوتې ني شمعهائي بئير ڪيو 44 هان ڪهيو ڪم، ”خبردار، آي بات ڪيني پي ني شٽائي پڻ ايشور ري گهر ۾ جائي آيو شير پوجاري ني بتا هان او چٽهائو چاڙه جڪي ري باري ۾ موسي ري شاستر ۾ حڪم هي، ايئي شون شجون ني خبر پڙسي ڪه تو شاجو هويو هي.“ 45 پڻ او ٻاهر جائي جيت ڪيت شٽاڻ لاڳو هان ايئي بات ني اترې تو مشهور ڪي ڪه پريو يسوع ڪي پي شهر ۾ کلي عام جائي ڪونهي شگهتو. پريو يسوع هيڪلور رڻ پت ۾ ريوڻ لاڳو پڻ تو پي چارئي پاشي منڪ اوتې ڪڍي آئي جاوتا.

پريو يسوع رو آڌرنگي ني شاجو ڪرڻ

(متي 9:1-8؛ لوقا 5:17-26)

1 ڪئينڪه ڏنون شون پڇي پريو يسوع ڪفرنحوم شهر ۾ پاچو آيو، تو اوتې ري گهرې اوڻ ري خبر چارئي پاشي بڪري گئي. 2 پڇي اترې 2 تو منڪ آئي پيڙا هوي ڪه شجو گهر پريجي گيو هان در تي اڀڻ ري ڪو پي جگها ڪونهي رئي. جڏي پريو يسوع اوتون منڪون ني ايشور ري باتون شٽاوتو پڙيو، 3 تو ڪئينڪه منڪ هيڪي آڌرنگي ني چارون منڪون شون ڪڻائي پريو يسوع ڪڍي لي آيا. 4 پڻ گهڻي رش ري ڪري اوتې

2

ڪڍي ڀڳي ڪونهي شگهيا. ائيني رڳي ڪري اوتون ڇڏي نئي اوت شون ڪولي جيت ٻريو يسوع هتو هان اڏرننگي منڪ نئي جهولي شودو هينو اٿاريو. 5 ٻريو يسوع اوتون رو اٿرو وشواس ڏينوم تو بيمار نئي ڪهيو ڪم. ”ڏيڪرام تارا پاپ معاف هويا را.“ 6 اوت ڪئينڪه ڌرمي گرو پينا هتا. او آڀري من ۾ شوچڻ لاگا ڪم. 7 ”اي ڪٺ هئي جڪو آڀني ايشور شمجهي هئي؟ ڪيونڪه ايشور شون نال بيجو ڪو پي پاپ معاف ڪري ڪونهي شگهتو.“ 8 ٻريو يسوع نئي يڪدم خبر پڙي ڪه او آڀري من ۾ ڪي شوچي پڙيا. اوتني اوتون نئي ڪهيو ڪم. ”تئي آڀري من ۾ اهڙي باتون ڪيون شوچو هو؟ 9 ائيني اڏرننگي نئي اي ڪيوڻ شولو هئي ڪم. ”تارا پاپ معاف هويا را“ جون اي ڪيوڻ ڪم. ”اٺي، آڀري جهولي ڪٺ گهم ڦر.“ 10 پٺ هون توني اي ڪري بتائين ڪه هون منش پتر هون هان مهني جگت ۾ پاپ معاف ڪرڻ ري اختيار هئي. ”پچي ٻريو يسوع بيمار نئي ڪهيو ڪم. 11 ”هون تئي ڪونه هون ڪه اٺي، آڀري جهولي ڪٺ هان آڀري گهري بوڻو جا.“ 12 تو او منڪ اٺيو هان اوتيج تيم آڀري جهولي ڪئي شجون ري روبرو آڀري گهري بوڻو گيو. اي جوئي شجائي منڪ تموم گهڻا حيون هويا هان ايشور ري ٻڌائي ڪري ڪيوڻ لاگا ڪم. ”مهون ايتون ڪڏي پي ڪونهي ڏينو.“

### ٻريو يسوع رو لوي نئي هيلو ڪرڻ

(متي 9:9-13؛ لوقا 5:27-32)

13 ٻريو يسوع پڙي گليل ڍنڍ ري ڪپ تي گيو. اوت تموم گهڻا منڪ اوتني ڪڍي پڙا هويا هان او اوتون نئي شيڪاوڻ لاگو. 14 اوت جاوتي بلا اوتني حلفي ري ڏيڪري لوي يعني متي نئي ناڪو ليتي ڏينو. ٻريو يسوع اوتني نئي ڪهيو ڪم. ”مهارو چيلو هوئي مهاري لاري بي.“ ائيني تي لوي اٺيو هان ٻريو يسوع لاري بيون لاگو.

15 اوتني شون پچي ٻريو يسوع لوي ري گهري دعوت تي گيو. اوت تموم گهڻا ناڪو ليون آلا هان بيجا پابي منڪ پي ٻريو يسوع هان اوتني ري چيلون پڙا اوتني دعوت ۾ ٻائي کاوتا پڙيا. 16 اي جوئي فريسي منڪون ري ڌرمي گروئون، ٻريو يسوع ري چيلون نئي ڪهيو ڪم. ”تونرو گرو ناڪو ليون آتون هان پابي منڪون پڙو ڪيون کاوي پيني هئي؟“ 17 ٻريو يسوع اي شئي اوتون نئي اي مثال شٽائي ڪم. ”شاجون شورون نئي ڊاڪٽر ري ضرورت ڪونهي پٺ بيمارون نئي. هون نڪ منڪون نئي نام پٺ پايون نئي هيلو ڪرڻ آيو هون.“

### روزي ري باري ۾ سوال

(متي 9:14-17؛ لوقا 5:33-39)

18 هيڪي گهمري جڏي يوحنا پويتر سنون ڏيون آئي ري چيلون هان فريسي منڪون روزا راکيا. تو ڪئينڪه منڪ ٻريو يسوع ڪڍي آيا هان پوچو ڪم. ”يوحنا پويتر سنون ڏيون آئي را چيلا هان فريسي منڪ تو روزا راکي هئي، پٺ تونرا چيلا ايتون ڪيون ڪونهي ڪرتا؟“ 19 ٻريو يسوع اوتون نئي بلتي ڏيني ڪم. ”جتري توڻي لاڏو جون پڙو هئي، تو ڪي اوتون نئي روزا راکي ڪئي؟ نام پٺ جڏي لاڏو ايتون پڙو هئي، تو ايتون نئي روزا راکي ري ضرورت ڪونهي. 20 پٺ هيڪ ڏن آشي جڏي لاڏو اوتون شون ڌار ڪيو جاشي، تو اوتني تيم او ضرور روزا راکشي. 21 ڪو پي منڪ نوتني گاڀي ري

ڪاري پڙهي ڳايي تي ڪونهي لڳاوتو. جي او ايئون ڪرشيءَ، تو نُوئي ڳايي ري ڪاري پيڙي هوني پڙهي ڳايي ني ڦاڙي چوڙشي. 22 ايني نموني ڪو پي منڪ انگورون رو تازو رس پڙهي ڏيڙيون ۾ ڪونهي ڀرتو. جي ايئون ڪرشيءَ، تو تازي رس ري ڪري پڙهي ڏيڙي پيڄي ڦاڙي جاشي. پيڄي ڏيڙي هان انگورون ري رس پيئون رو زينون هوني جاشي. ايني ري ڪري تازو انگورون رو رس نُوئي ڏيڙيون ۾ پري هيءَ.“

**پريو يسوع پويتر ڏن رو مالڪ**

(متي 8-1:12؛ لوقا 5-1:6)

23 هيڪي گهمري پريو يسوع پويتر ڏن رو آپري چيلون پيڙو پوک شون لنگهيو، تو اوني را چيلا ڪٽڪ را شتا توڙي ڪاوڻ لاڳا. 24 اي جوئي فريسي منڪون پريو يسوع ني ڪهيو ڪه، ”جوئو، ٿونا چيلا او ڪوم ڪري هي جڪو پويتر ڏن تي ڪرڻ جائز ڪونهي.“ 25 پريو يسوع ائون ني بلتي ڏيني ڪه، ”تون دائود ري باري ۾ شاستر ۾ ضرور پڙهيو هوشي ڪه جڏي اوني ني هان اوني ري منڪون ني پوک لاڳي، تو اوني ڪي ڪيئو؟ 26 او ايشور ري پوجاريون ري سردار ابي ياتر ري ڏنون ۾ ايشور ري گهر ۾ گيو هان اوني ايشور ري نون ڪيئوڙي ٻاتي ڪاڏي هان آپري منڪون ني پي ڪاوڻ ري شارو ڏيني. پڻ ڌرمي قانون تي او ٻاتي رگو ايشور را پوجاري ڪائي شگهتا.“ 27 پريو يسوع ائون ني ڪهيو ڪه، ”انسون پويتر ڏن ري شارو ڪونهي ناهيوڙو پڻ پويتر ڏن انسون ري شارو ناهيوڙو هي.“ 28 هون منس پتر هون، ايني ري ڪري پويتر ڏن رو پي مالڪ هون.“

**شوڪوڙي هات آلي منڪ ني شاجو ڪرڻ**

(متي 14-9:12؛ لوقا 11-6:6)

3 <sup>1</sup> پريو يسوع پيڙي پگني گهر ۾ گيو. اوٽ هيڪ منڪ هتو، جڪي رو هات شوڪوڙو هتو. 2 اوٽ ڪئينڪ اهڙا منڪ پي هتا جڪو پريو يسوع تي الزوم هئڻ ري تال ۾ هتا هان او ايني انتظار ۾ هتا ڪه پريو يسوع پويتر ڏن رو اوني ني شاجو ڪرشي جون نا. 3 پيڄي پريو يسوع شوڪوڙي هات آلي منڪ ني ڪهيو ڪه، ”ايت بچ ۾ آئي آپ.“ 4 پيڄي پريو يسوع ائون شون پوچو، ”مهني شٽائو ڪه پرميشور ري حڪمون تي پويتر ڏن رو پلائي ڪرڻ صحيح هي جون بچڙائي؟ ڪيني بچاوڻ صحيح هي جون ڪيني مارڻ؟“ 5 پڻ او مات هتا. 5 پريو يسوع ني ائون ري ڪائي من ري ڪري ڏڪ هيو. پيڄي اوني چارئي پاسي ائون شجون ني ريش ۾ جويو هان شوڪوڙي هات آلي منڪ ني ڪهيو ڪه، ”آپرو هات ڏيگهو ڪر.“ تو اوني اينوج ڪيئو. پيڄي اوني رو هات يڪدم شاجو هوني گيو. 6 ايني تي فريسي منڪ اونيچ تيم ٻاهر گيا هان هيروديس بادشاه ري منڪون شون صلاح ڪرڻ لاڳا ڪه، ”ڪيڪر پريو يسوع ني مارون؟“

### تموم گهڻي منڪون ني شاجا ڪرڻ

<sup>7</sup> پڇي پرڻو يسوع آيري چيلون پيڙو گليل دنڍ ڏيشا گيو. تموم گهڻا منڪ اوئي لاري بيوڻ لاگا. او منڪ گليل صوبي هان يهوديا صوبي ري شجي علائقي <sup>8</sup> هان يروشلم، اڊوميا، صور شهر، صيدا شهر هان ڀرڻ دريا ري پيلوڙي پاسي شون آيوڙا هئا. او ايني ري ڪري آيا هئا ڪيونڪه اوئون ني خبر پڙي ڪه پرڻو يسوع موتا موتا پرچا بناوي هي.

<sup>9</sup> پرڻو يسوع آيري چيلون ني ڪهيو ڪه، ”مهاري شارو هيڪ نڀڪي پڙي رو بندوبست ڪرو. منڪ تموم گهڻا هي ايئون ني هووي ڪه او مهني لئاڙي چوڙي.“ <sup>10</sup> ڪيونڪه پرڻو يسوع تموم گهڻي منڪون ني شاجا ڪيئا هئا ايني ري ڪري اوئي ري چارئي پاسي تموم گهڻا بيمار منڪ هئا هان او اوئي ني هات لگاڻ ري ڪوشش ۾ هئا. <sup>11</sup> جڏي پوت لاگوڙا منڪ پرڻو يسوع ني ڏيڪتا، تو اوئي آگهي ڪري رڙي ڪري ڪيتا ڪه، ”تو ايشور رو ڏيڪرو هي.“ <sup>12</sup> پرڻو يسوع اوئون ني هدايت ڪري ڪهيو ڪه، ”آي بات ڪيني پي ني شٽايا.“

### پرڻو يسوع رو ٻارهي سنت چونڊڻ

(متي 10:1-4؛ لوقا 12:6-16)

<sup>13</sup> پڇي پرڻو يسوع هيڪي جبل تي گيو. اوئي آيري مرضي را منڪ آڀ ڏيشا اٿايا، تو او منڪ اوئي ڪڍي آيا. <sup>14</sup> پڇي پرڻو يسوع اوئون ۾ ٻارهي منڪ چونڊيا [جڪون ني اوئي سنت ڪهيو] ڪه او اوئي پيڙا ري هان اوئون ني ميلي ڪه او جائي پرچار رو ڪوم ڪري. <sup>15</sup> اوئون ني پوت ڪاڍڻ ري اختيار پي ڏيني.

<sup>16</sup> اوئون ٻارهن چيلون را نون آي هي، شمعون جڪي رو نون پرڻو يسوع بطرس پي راڪيو، <sup>17</sup> زبدي را ڏيڪرا يعقوب هان يوحنا، جڪون را نون پرڻو يسوع بوانرگس راڪيو. (بوانرگس رو مطلب هي ”گرجن آلا.“) <sup>18</sup> اندرياس، فلپس، برتلمائي، متي، توما، حلفي رو ڏيڪرو يعقوب، تدائي، شمعون جڪي ني وطن دوست پي ڪي هي <sup>19</sup> هان يهودا اسڪريوتي جڪي پڇي دوکو ڏي پرڻو يسوع ني جهلايو.

### پرڻو يسوع هان بعل زبول

(متي 22:12-32؛ لوقا 11:14-23، 12:10)

<sup>20</sup> پڇي پرڻو يسوع ڪفرنحوم شهر ۾ اوئي گهر ۾ پاڇو آيو جيت او ريتو. پڻ اوڻ اٿرا تو منڪ آي پيڙا هويا ڪه او هان اوئي را چيلا ٻاتي پي ڪائي ڪونهي شگهيا. <sup>21</sup> جڏي پرڻو يسوع ري عزيزون شٽيو، تو او اوئي ني جهالڻ آيا ڪيونڪه اوئون شوچو ڪه او ڪالهو هويو رو.

<sup>22</sup> ڪينڪه ڌرمي گرو يروشلم شهر شون آيوڙا هئا، او ڪيوڻ لاگا ڪه، ”يسوع ۾ پوتون رو سردار بعل زبول هي هان او اوئي ري مدد شون پوت ڪاڍي هي.“ <sup>23</sup> ايني تي پرڻو يسوع اوئون ني آڀ ڪڍي اٿائي آي مثال ڏي پوچو ڪه، ”شيطون، ڪيئون شيطون ني ڪاڍشي.“ <sup>24</sup> جي ڪي

بادشاهي ۾ ڦوٽ پڙي، تو او برباد هوئي جاوِي هِي 25 هانَ جي ڪي گهر ۾ ڦوٽ پڙي هِي، تو او گهر پي برباد هوئي جاوِي هِي. 26 اِئيني نمُوني جي شيطون ري بادشاهي ۾ ڦوٽ پڙي هانَ اُوئي را چيلا هيڪي بيجي ري خلاف هوئي جاوِي، تو اُوئي ري بادشاهي ختم هوئي جاشي.

27 ڪو پي منڪ ڪي طاقت آئي منڪ ري گهر ۾ جاني اُتري توڻي ڦر ڪونهي ڪري، جتري توڻي اُوئي ني بوندِي ني. اُوئي شون پيچي او گهر ري ڦر ڪري شگهي هِي. 28 هونَ توڻي شاچي ڪونه هون ڪه انسون رو هر هيڪ پاپ هانَ ايشور ري خلاف ڪهيوڙي بات معاف ڪي جاشي.

29 پڻ جي ڪن پويتر آتما ري خلاف بات ڪرشي، تو اُوئي ني ڪڏي پي معافي ڪونهي ملي هانَ اُوئي رو آي باب هميشا توڻي ريشي. 30 پريو يسوع اِئون اِئيني ري ڪري ڪهيو ڪيونڪه اُوئون ڪهيو هتو ڪه، ”اُوئي ۾ پوت هِي.“

### پريو يسوع ري ما هانَ پائي

(متي 12:46-50؛ لوقا 8:19-21)

31 پيچي پريو يسوع ري ما هانَ پائي آيا پڻ تموم گهڻا منڪ هوڻ ري ڪري باهر آبي رهيا هانَ پريو يسوع ني هيلو ڪرايو. 32 او منڪ جڪو پريو يسوع ري چوڌاري بينوڙا هتا اُوئون سُٽايو ڪه، ”تاري ما هانَ ٿارا [بين] پائي باهر آيا هِي هانَ ٿئي اُٿايو هِي.“ 33 اِئيني تي پريو يسوع اُوئون شون پوچو ڪه، ”مهاري ما هانَ مهاري پائي ڪن هِي؟“ 34 پيچي اُوئي آبري چوڌاري بينوڙي منڪون ني جوئي ڪهيو ڪه، ”جوئو، مهاري ما هانَ پائي آي هِي، 35 ڪيونڪه جڪو پي ايشور ري باتون سُٽي هانَ اُوئون تي بي هِي، اوج مهارو پائي، مهاري بين هانَ مهاري ما هِي.“

### بيج چئن آئي رو مثال

(متي 13:1-9؛ لوقا 8:4-8)

1 پريو يسوع هيڪ گهمرو گليل ڍنڍ ري ڪپ تي شيڪاوڻ لاگو. اُوئي ري چوڌاري اِترا تو منڪ آئي پيڙا هويا ڪه او جاني هيڪي پيڙي 4  
۾ چڙهي بينو هانَ شجائي منڪ ڪپ تي آبي رهيا. 2 پريو يسوع اُوئون ني تموم گهڻي مثالون ڏي سمجهايو هانَ شيڪاوڻ لاگو ڪه، 3 ”دهيون ڏي سُٽو. هيڪ هائي بيج چئن گيو. 4 بيج چئن بلا ڪئين ڏوٽا مارگ تي ڪريا هانَ پڪيون اُوئون ني چڱي ليئا. 5 ڪئين ڏوٽا پٿرون آئي بني ۾ ڪريا جيٽ گهڻو بڻجھو ني هوڻ ري ڪري او چيڪا اگا. 6 جڏي سُورج نڪريو، تو او ڪوماتيبي ڪيا هانَ اُونڌي پال ني هوڻ ري ڪري سُوڪي ڪيا. 7 ڪئين ڏوٽا ڪانڊيرون ۾ ڪريا، ڪانڊيرا پي اُوئون پيڙا ٻڌڻ لاگا پڻ ڪانڊيرون اُوئون ني ٻڌڻ ڪونهي ڏينو هانَ نڪو اُوئون ۾ ڦل لاگو. 8 ڪئين ڏوٽا پلي بني ۾ ڪريا هانَ او اگا، ڪي ۾ تبه ڏوٽا تو ڪي ۾ سن تو ڪي ۾ سئو ڏوٽا لاگا.“ 9 آي مثال سُٽائي پريو يسوع ڪهيو ڪه، ”سُٽڻ آلا سمجھي را.“

مثالون ۾ سٿاڻڻ رو مقصد

(متي 17-10:13؛ لوقا 8:9-10)

10 جڏي پريو يسوع هيڪلو هتم، تو اُئي ري ٻارهون چيلون هانَ بيجون چيلون اُئي شون مثال رو مطلب پوڄو. 11 پريو يسوع اُئون ني بلتي ڏيني ڪم، ”ايشور تو ٿوئي آڀري بادشاهي ري پيدون ري سمجه ڏيني هي پڻ بيجون ني هون مثالون ڏي سٿائون هون، 12 ايني ري ڪري ايشور ري شاستر ري اي بات پوري هووي ڪم.

’ او جوتا ريشي پڻ اولڪي ڪونهي

هانَ سٿشي پڻ سمجهي ڪونهي.

متان اينون ني هووي ڪم او مهني ڏيشا ڦري

هانَ هون اُئون ني معاف ڪرون.“

بيج چئن آئي مثال رو مطلب

(متي 23-18:13؛ لوقا 8:11-15)

13 پڇي پريو يسوع آڀري چيلون ني ڪهيو ڪم، ”ڪي ٿي ايني مثال رو مطلب ڪونهي سمجهتا، تو پڇي ٿي بيبي شجي مثالون رو مطلب ڪيڪر سمجهشو؟ 14 ايني مثال ۾ بيج رو مطلب هي، ايشور ري باتون. 15 جڪي مارگ تي ڏوٿا ڪريام او مارگ اهڙا منڪ هي جڪو ايشور ري باتون سٿي هي پڻ شيطون آئي اُئون ري من شون ايشور ري باتون ڪاڍي لي هي. 16 ايني نموني پتروني آئي بني، جيٿ ڏوٿا ڪريام اهڙا منڪ هي جڪو ايشور ري باتون سٿي هي هانَ اُنيج تيم اُئي ني خوشي شون مني هي. 17 پڻ او پال ڪونهي جهالتا هانَ ٿوڙي تيم ري سازو وشواس راڳي هي هانَ جڏي ڪو آزموتو هووي هي، تو او ڦري جاوي هي. 18 جڪو ڏوٿا ڪانديرون آئي بني ۾ ڪريام او بني اهڙا منڪ هي جڪو ايشور ري باتون سٿي تو هي، 19 پڻ دنيا ري گيتي هانَ ڏن رو لالچ ايشور ري باتون ني دٻائي چوڙي هي هانَ اُئون ۾ ڪو پي ڦل ڪونهي لاگنو. 20 جڪو ڏوٿا پلي بني ۾ ڪريام او بني اهڙا منڪ هي جڪو ايشور ري باتون سٿي هانَ مني هي هانَ اُئون ۾ ڦل پي لاڳي هي، ڪي ۾ تيه، ڪي ۾ سن تو ڪي ۾ سئو ڏوٿا لاڳي هي.“

### ڏيئي رو مثال

(لوقا 8:16-18)

21 پڇي پريو يسوع ائون نِي ڪهيو ڪه، ”ڪي ڪو منڪ ڏيئو ٻائي ڪي نون هيٺا جون ڪي مڇي هيٺا راڪي هي؟ ٺا، پڻ اوني نِي اهڙي جگها تي راڪي هي جيٺ شون اُجالو هووي، 22 ڪيونڪه ڪو پي لڪيوڙي شئي اهڙي ڪونهي جڪو ظاهر نِي ڪي جاوي هان ڪو پي اهڙو پيد ڪونهي جڪي ري خبر نِي پڙي هان او ٻڌرو نِي ڪيو جاوي. 23 شئن آلا سمجھي را.“

24 پريو يسوع ائون نِي آي پي ڪهيو ڪه، ”مهاري باتون ڏهيون ڏي شئو. جڪي ماڻي شون ٿي ماڻو هوم اوڻيچ ماڻ شون ايشور ٿوني ڏيئي پڻ اوني شون پي وڌيڪ ڏيئي، 25 ڪيونڪه جڪي ڪيڏي ايشور ري باتون ري سمجھ هي اوني نِي وڌيڪ ڏيئي جاشي پڻ جڪي ڪيڏي ايشور ري باتون ري سمجھ ڪونهي اوني شون او سمجھ پي ڪوشي جاشي جڪو اوني ڪيڏي هي.“

### بيج اگڻ رو مثال

26 پڇي پريو يسوع ڪهيو ڪه، ”ايشور ري بادشاهي ري مثال هيڪي هائي آلي ڪار هي جڪي آڀري بني ۾ بيج چئيو. 27 اوني شون پڇي او پلي شوني جون جاگي پڻ بيج هائي اگي هان موتو هووي هي هان اوني منڪ نِي اوني ري ڪو پي خبر ڪونهي پڙي. 28 بني شون پوک هائي اگي هي. بيل پون، پڇي شتا هان پڇي بيج نڪري هي. 29 پڻ پوک پڪڻ شون پڇي او منڪ ڏاتري شون لئي هي ڪيونڪه لهاري رو تيم هووي هي.“

### سرسيمون ري بيج رو مثال

(متي 13:31-32؛ لوقا 13:18-19)

30 پڇي پريو يسوع ڪهيو ڪه، ”ايشور ري بادشاهي ڪهڙي هي هان هون اوني نِي ڪي شون پيٽائون؟ 31 او سرسيمون ري بيج آلي ڪار هي. جڏي او پوکيو جاوي، تو او سڄي بيج شون نينو هووي هي. 32 پڻ جڏي اگي هي، تو او سڄي بئون شون موتو هووي هي هان اوني ري ٺائي اتري تو موتي هووي هي ڪه پڪي اوني ري چان ۾ آلا ناوي هي.“ 33 پريو يسوع تموم گهڻي مثالون ڏي منڪون نِي ايشور ري باتون شٽاوتو ڪه او سمجھي شگهي. 34 او مثالون شون ٺال ائون شون ڪو پي باتون ڪونهي ڪرتو پڻ هيڪلائي ۾ آڀري چيلون نِي سڄي باتون رو مطلب سمجهاوتو.

### پريو يسوع رو طوفون نِي بند ڪرڻ

(متي 8:23-27؛ لوقا 8:22-25)

35 اوني ڏن شام رو پريو يسوع آڀري چيلون نِي ڪهيو ڪه، ”هالو تو آڀي ڏنڊ ري پيلوڙي پاشي هالون.“ 36 پڇي چيلا منڪون نِي اوتج چوڙي اوني بيڙي ۾ چڙهيا جڪي ۾ پريو يسوع پيل بينو هتو هان چيلا اوني نِي آڀ پيڙو لي گيا. ائون بيڙي بيجي بيڙي پي هتي. 37 اوچتو ڏنڊ ۾ موتو طوفون آيو هان چوليون ري ڪري بيڙي ٻوڏڻ لاڳي. 38 پريو يسوع بيڙي ۾ لاري اوشيمو شروٽي راکي اونگاجوڙو هتو. تو چيلون آئي اوني نِي جگايو هان

ڪهيو ڪم، ”گرو جي، مهني تو ٻوڏڻ آلا هون، تون مهرو ڪو پي فڪر ڪونهي؟“<sup>39</sup> ائين تي پريو يسوع ائي طوفون ني دڙڪو ڏينو هان ٻوڏي ري چوليون ني حڪم ڏينو ڪم، ”اڀي رو.“ تو طوفون يڪدم اڀي رهيو هان ناپر هوڻي گئي. <sup>40</sup> پڇي پريو يسوع ائون ني ڪهيو ڪم، ”تي ڪيئون بيٺاجو هو؟ آجون توڻي تونرو وشواس ڪيٽ هي؟“<sup>41</sup> ائين تي او تموم گهڻا بيٺاجا هان آبت ۾ ڪيوڻ لاگا ڪم، ”آي ڪهڙو منڪ هي جڪو طوفون هان ٻوڏي ني حڪم ڏي هي هان او پي اوڻي ري مني هي؟“

### پريو يسوع رو منڪ شون پوت ڪاڍڻ

(متي 8:28-34؛ لوقا 8:26-39)

**5** <sup>1</sup> پڇي پريو يسوع هان اوڻي را چيلا گليل ڊنڊ ري پيلوڙي پاشي گراسينيون ري علائقي ۾ پڳا. <sup>2</sup> آجون پريو يسوع بيڙي شون اترڻ آلو هتو، تو هيڪ پوت لاگوڙو منڪ مڪومون شون نڪري اوڻي ڪيڍي آيو. <sup>3</sup> او منڪ مڪومون ۾ ريتو هان اوڻي ني ڪو پي شونڪڙون شون بونڊي ڪونهي شگهتو. <sup>4</sup> منڪ اوڻي ني گهڙي گهڙي شونڪڙون هان ڏنڊا بيڙيون شون بونڊتا پڻ او شونڪڙون هان ڏنڊا بيڙي توڙي ٽڪڙا ٽڪڙا ڪري چوڙتو هان ڪو پي اوڻي ني ڪاڻو ڪري ڪونهي شگهتو. <sup>5</sup> او هميشا ڏن رات مڪومون هان جبلون ۾ رڙي ڪرتو هان آبرو آڻي پٿرون شون لوڻي جهوڻ ڪرتو.

<sup>6</sup> جڏي اوڻي پريو يسوع ني الگي پون شون ڏينو، تو ناشي اوڻي ڪيڍي گيو هان اوڻي ري پگون ۾ ڪريو <sup>7</sup> هان رڙ ڪري ڪهيو ڪم، ”اي يسوع، پرميشور را ڏيڪرا، ٿارو مهني شون ڪهڙو واسطو؟ هون ٿي منت ڪرون هون ڪه ايشور ري واسطي، مهني ايڏا ني ڏي.“<sup>8</sup> اوڻي ائين ري ڪري ڪهيو ڪيونڪه پريو يسوع پوت ني اوڻي منڪ شون نڪري جاوڻ رو حڪم ڏينو هتو. <sup>9</sup> پريو يسوع اوڻي شون پوڇو ڪم، ”ٿارو نون ڪي هي؟“ اوڻي بلتي ڏيني ڪم، ”مهرو نون لشڪر هي ڪيونڪه مهني تموم گهڻا هون.“<sup>10</sup> پڇي او پريو يسوع ني تموم گهڻي منتون ڪري ڪيوڻ لاگو ڪم، ”مهوني ائين علائقي شون ني تگڙ.“<sup>11</sup> اوٿ جبل تي شوڙون رو موتو ڏڻ چرتو پڙيو. <sup>12</sup> پوت پريو يسوع ني منت ڪري ڪهيو ڪم، ”مهوني موڪل ڏينو، تو مهني اوڻي شوڙون ري ڏڻ ۾ جائون.“<sup>13</sup> پڇي پريو يسوع ائون ني موڪل ڏيني، تو پوت اوڻي منڪ شون نڪري شوڙون ۾ گيا. شوڙ اندازن بي هزار هتا. او جبل شون ناشتا هينا جائي ڊنڊ ۾ ڪريا هان ٻوڏي موٽا.

<sup>14</sup> اي واقعيو جوڻي دراڙ شهر ڏيما هان آشي پاشي ري علائقي ڏيما نانا هان منڪون ني جائي اي بات سٿايي. <sup>15</sup> پڇي منڪ اي واقعيو جوڻ ري ساڙو پريو يسوع ڪيڍي آيا هان ائون اوڻي منڪ ني ڏينو، جڪي ۾ پوت يعني پوتون رو لشڪر هتو، او گاپا پريوڙا هان شاجو شورو بينوڙو ڏينو، تو او بيٺاجا. <sup>16</sup> جوڻ آئون پوت آئي منڪ ري باري ۾ هان شوڙون ري باري ۾ بيجون ني پي سٿايو. <sup>17</sup> پڇي منڪ پريو يسوع ني منت ڪري ڪيوڻ لاگا ڪم، ”تو مهوري علائقي شون ٻوڏو جا.“<sup>18</sup> جڏي پريو يسوع بيڙي ۾ چڙهڻ لاگو، تو جڪي ۾ پوت نڪريا هتا او منت ڪري ڪيوڻ لاگو ڪم، ”گرو جي، مهني پي آب پيڙو لي هالو.“<sup>19</sup> پڻ پريو يسوع اوڻي ني پاليو هان ڪهيو ڪم، ”آپري گهري پاڇو جا هان جائي آپري عزيزون ني

شُٽا ڪم، ’پرميشور ٿي شون ڪهڙي پلائي ڪي هي۔‘“<sup>20</sup> پڇي او منڪ پاڇو گيو هانَ جائي دُڪپلس زي علائقي ۾ آي بات مشهور ڪي ڪم، ”پرئو يسوع مهِي شون هيڪ موتي پلائي ڪي هي۔“ آي بات سُٺي شجائي منڪ تموم گهڻا حيرون هويا۔

### يائير ري ڏيڪري هانَ بيمار لُگائي

(متي 9:18-26؛ لوقا 8:40-56)

<sup>21</sup> جڏي پرئو يسوع ٻيڙي ۾ چڙهي ڏنڊ زي پيلوڙي پاشي گيو، تو تموم گهڻا منڪ اُوئي ڪيڏي ڏنڊ زي ڪپ تي آئي پيڙا هويا۔<sup>22</sup> اوٽ يائير نون رو هيڪ منڪ آيو جڪو پگني گهر رو سردار هتو۔ او پرئو يسوع ني ڏيڪي اُوئي ري پگون ۾ ڪريو<sup>23</sup> هانَ منڪ ڪري ڪيوڻ لاگو ڪم، ”مهاري نڪي ڏيڪري مرڻ تي هي۔ مهريوني ڪري ٿي اُو هانَ آيو هات اُوئي تي راکوم، تو او شاجي هوئي جاوِي پڻ مرڻ شون بچي جاوِي۔“<sup>24</sup> تو پرئو يسوع اُوئي پيڙو گيو هانَ تموم گهڻا منڪ اُوئي لاري ڪيوڻ لاگا هانَ اُوئي ري چوڌاري تموم گهڻا منڪ هتا۔

<sup>25</sup> اوٽ رش ۾ هيڪ بيمار لُگائي هتي جڪي ني ٻارهنون شالون شون زناني بيماري هتي هانَ شاجي ڪونهي هوتي۔<sup>26</sup> اُوئي آيو شجائي رُپيا علاج ڪراوڻ ۾ خرچ ڪيا پڻ اُوئي ني ڪو پي فائو ڪونهي هويو، پڻ او آجون پي وڌيڪ بيمار هوتي گئي۔<sup>27</sup> او لُگائي پرئو يسوع زي باري ۾ سُٺي تموم گهڻي رش ۾ اُوئي لاري آئي هانَ اُوئي ري گاپون ني هات لگايو،<sup>28</sup> ڪيونڪه اُوئي آري من ۾ شوچو هتو ڪم، ”جي هون پرئو يسوع ري گاپون ني هات لگائين، تو شاجي هوئي جائين۔“<sup>29</sup> تو او يڪدم شاجي هوئي گئي هانَ اُوئي ني خبر پڙي ڪه مهاري بيماري ختم هوئي ري۔<sup>30</sup> پرئو يسوع ني يڪدم خبر پڙي ڪه مهِي شون قُدرت نڪري هي۔ اِئين تي اُوئي پوچو ڪم، ”مهاري گاپون ني ڪي هات لگايو هي؟“<sup>31</sup> چيلون ڪهيو ڪم، ”اي پرئو، تموم گهڻا منڪ تونري چوڌاري ڦريوڙا هي هانَ او تون مائي ڪري پڙيا۔“<sup>32</sup> پرئو يسوع چارئي پاشي جويو، خبر پڙي ڪه مهني ڪي هات لگايو هي۔<sup>33</sup> جڏي اُوئي لُگائي ڏينو ڪه همي هون لڪي ڪونهي شگهتي، تو او بيئاجتي اُوئي ري پگون ۾ ڪري هانَ شجي بات ڪري سُٽائي۔<sup>34</sup> پرئو يسوع ڪهيو ڪم، ”ڏيڪري، تاري وشواس ٿي شاجي ڪي هي۔ جاء ايشور ٿي شڪي راکي، ڪيونڪه تُو اِئيني بيماري شون شاجي هوئي هي۔“

<sup>35</sup> پرئو يسوع آجون ٻولتو پڙيو، تو پگني گهر ري سردار يائير ري گهرون شون منڪون آئي سُٽايو ڪم، ”تاري ڏيڪري مُٽي ري۔ همي گرو جي ني تڪليف ني ڏي۔“<sup>36</sup> پرئو يسوع آي بات سُٺي يائير ني ڪهيو ڪم، ”ني گهرا، رگو وشواس راک۔“<sup>37</sup> پڇي پرئو يسوع، بطرس، يعقوب هانَ اُوئي ري پائي يوحنا شون ٿال بيجو ڪيني پي آپ پيڙو اوڻ ڪونهي ڏينو۔<sup>38</sup> جڏي او پگني گهر ري سردار ري گهري پُگو، تو پرئو يسوع ڏينو ڪم تموم گهڻو هُل هي هانَ منڪ چوڪري ري شارو تموم گهڻا روئي پڙيا۔<sup>39</sup> پرئو يسوع گهر ۾ جائي اوئون ني ڪهيو ڪم، ”تي ڪيون روئو هانَ هُل ڪرو هوم، چوڪري مُٽي ڪونهي، پڻ اُونگاجوڙي هي۔“<sup>40</sup> تو منڪ پرئو يسوع تي هسڻ لاگا۔ پڻ اُوئي شجون منڪون ني اوٽ شون ٻاهر ڪاڍيا، رگو چوڪري ري ما ٻاپ ني هانَ آري چيلون ني گهر ۾ اوڻ ڏينا جيت لاش هتو۔<sup>41</sup> پرئو يسوع چوڪري رو هات جهالي ڪهيو ڪم، ”نليتا قومي۔“

جڪي رو مطلب هي ”ذڪري، هون ٿي ڪونه هون، اٺ.“<sup>42</sup> ائين تي او ٻارهي شالون ري چوڪري اُٺيج تيم اُٺي بيبي هان بيوڻ لاڳي. اي جوئي منڪ تموم گهڻا حيرون هويا.<sup>43</sup> پرڻو يسوع اُٺون ني هدايت ڪري ڪهيو ڪم، ”اي بات ڪيني پي ني شٽايا.“ پڇي پرڻو يسوع اُٺون ني ڪهيو ڪم، ”چوڪري ني ڪاوڻ ري شارو ڪئين ڏيئو.“

### ناصرٽ اُٺون رو پرڻو يسوع ني ني منڻ

(متي 13:53-58؛ لوقا 4:16-30)

**6**<sup>1</sup> پڇي پرڻو يسوع اوت شون بئير هوئي آپري شهر ناصرت ۾ آيو هان اُٺي را چيلا پي اُٺي پيٽا هتا. <sup>2</sup> جڏي پويتر ڏن آيو، تو او پگتي گهر ۾ گيو هان شيڪاوڻ لاڳو. اُٺي ري باتون سُٺي تموم گهڻا منڪ حيرون هويا هان پوچڻ لاڳا ڪم، ”ايني ۾ اترِي شمعج هان پرچا بناوڻ ري طاقت ڪيت شون آئي هي؟“<sup>3</sup> ڪي اي او واڍو ڪونهي جڪو مريم رو ڏيڪرو هي هان يعقوب، يوسيس، يهودا هان شمعون رو پائي هي؟ ڪي ايني ري بنون ايت ڪونهي ريتي؟“ اي باتون ڪري اُٺون پرڻو يسوع ني ڪونهي منيو. <sup>4</sup> پڻ پرڻو يسوع اُٺون ني ڪهيو ڪم، ”نبي ري آپري وطن، آپري عزيزون هان آپري خاندان شون ٿال هر جگها عزت هووي هي.“<sup>5</sup> ايني ري ڪري پرڻو يسوع رڳو ڪئينڪه بيمارون تي هات راکي شاجا ڪيئا پڻ ايني شون ٿال پيچو ڪو پي پرچو ڪونهي بتايو <sup>6</sup> ڪيونڪه اُٺون رو وشواس ني هوڻڻ ري ڪري او تموم گهڻو حيرون هويو. پڇي پرڻو يسوع آشي پاشي ري گون ۾ جائي منڪون ني شيڪاوڻ لاڳو.

### پرڻو يسوع رو ٻارهي سنت ميلڻ

(متي 10:5-15؛ لوقا 9:1-6)

<sup>7</sup> پڇي پرڻو يسوع آپري ٻارهون چيلون ني آپ ڏيشا هيلو ڪرايو هان اُٺون ني بي بي ڪري ميليا هان اُٺون ني اِختياري ڏيني ڪه منڪون شون پُوت ڪاڍو <sup>8</sup> هان اُٺون ني ڪهيو ڪم، ”مارگ ري شارو گيڏي شون ٿال ڪئين ني ليام ني ٻاتي، ني تيلو هان ني هڙ ۾ پشا. <sup>9</sup> جتا پيريام، پڻ پيچي ڪميش ني ليا.“<sup>10</sup> پرڻو يسوع اُٺون ني اي پي ڪهيو ڪم، ”جي تي ڪيري گهري جائو، تو اُٺي گهر ۾ اترِي توڻي رهيا جتري توڻي اوت شون بئير ني هوڻو. <sup>11</sup> جي ڪي جگها تي منڪ توڻي ني مني هان ٿونري ني سُٺي، تو اوت شون جاوتي بلا آپري پگون ري متي چنڊي چوڙيا ڪه اُٺون ري خلاف گواهي ري نشوني هووي.“

<sup>12</sup> پڇي خاص چيلا گيا هان جائي منڪون ۾ پرچار ڪيو ڪم، ”آپري پاپون شون توبهون ڪرو.“<sup>13</sup> پڇي اُٺون تموم گهڻي منڪون شون پُوت ڪاڍيا هان تموم گهڻي منڪون ني زيتون رو تيل لگائي شاجا ڪيئا.

هیرودیس بادشاه ری پریشونی

(متی 14:1-12؛ لوقا 9:7-9)

14 پرئو یسوع تموم گهڻو مشهور هو، تو گلیل صوبی ری بادشاه هیرودیس اونی ری باری ۾ شُٿیو. کئینک منک کیتا کم، ”آی پویر سنون ڏیوڻ آو یوحنا هی جکو مؤنوزون شون جیتو هو، هی، ایی ری کری او پرچا بتاوی هی.“<sup>15</sup> کئینک منک کیتا کم، ”آی ایلیاه نی هی.“ کئینک کیتا کم، ”نیون ۾ کو هیڪ.“<sup>16</sup> پڻ هیرودیس بادشاه پرئو یسوع ری باری ۾ شُٿیو، تو کھیو کم، ”آی یوحنا هی جکی ری مھی نَش بیدائی هتی پڻ او پڙی جیتو هو، هی.“<sup>17</sup> هیرودیس بادشاه آی بات ایی ری کری کی کیونک اونی آپری پائی فلپس ری لگائی هیرودیس شون بیٺان کیو هتو هان اونی ری کیوڻ تی یوحنا پویر سنون ڏیوڻ آئی نی جهلائی جیل ۾ گهاتیو هتو،<sup>18</sup> کیونک یوحنا هیرودیس نی کھیو هتو کم، ”تاری شارو جائز کونهی ک تو آپری پائی ری جیتی جی، اونی ری لگائی آپ کیدی راکي.“<sup>19</sup> ایی ری کری هیرودیس اونی شون دُشمینی راکتی هان اونی ری مرضی هتی ک اونی نی مرانی چوڙی پڻ ایئون کونهی هو،<sup>20</sup> کیونک هیرودیس بادشاه، یوحنا نی نیک هان بی ڏوهی سمجهتو. ایی ری کری او اونی شون بیٺاجتو هان اونی نی بچاوڻ ری کوشش کرتو. او یوحنا ری باتون شُٿی پریشون هتو، پڻ تو پی خُوشی شون شُٿو.<sup>21</sup> نیت هیرودیس نی وارو ملیو. هیرودیس آپری جنم ری خُوشی تی آپری وزیرون، فوجی اگووڻون هان گلیل صوبی ری موئی منکون نی دعوت ڏینی. <sup>22</sup> تو هیرودیس ری ڏیکری محفل ۾ آئی ناچی هان هیرودیس هان اونی را میموڻ تموم گهڻا خُوش هو. پچی بادشاه اونی چوکر ری نی کھیو کم، ”جکو مونگڻو هی او مونگ، هون ٿنی ڏین.“<sup>23</sup> اونی شونش لی کھیو کم، ”جی تو مھی شون آڏی بادشاهی مونگی، تو پی هون ٿنی ڏین.“<sup>24</sup> پچی اونی باهر جائی آپری ما شون پوچو کم، ”هون کی مونگون؟“ اونی کھیو کم، ”یوحنا پویر سنون ڏیوڻ آئی ری نَش.“<sup>25</sup> پچی او چوکر چیکی مئین آئی هان بادشاه نی کھیو کم، ”مهني هتون رو هتون یوحنا پویر سنون ڏیوڻ آئی ری نَش ٿال ۾ اٿائی ڏی.“<sup>26</sup> ایی بات تی هیرودیس بادشاه تموم گهڻو پریشون هو، پڻ اونی میموڻون آگهی شونش لی واعدو کیو هتو ایی ری کری او چوکر ری شون نا کری کونهی شگهیو.<sup>27</sup> پچی بادشاه اُوئیج تیم فوجی نی حُکم ڏینو ک اونی ری نَش بادی لی آ. او فوجی گیو هان جیل ۾ جائی یوحنا ری نَش بادی. <sup>28</sup> پچی ٿال ۾ گهاتی اونی چوکر نی ڏینی هان او آپری ما کیدی لی گئی. <sup>29</sup> آی بات شُٿی یوحنا را چیلا آیا هان اونی رو لاش لیئو هان جائی متی حوالی کیئو.

## پونج هزار منكون نِي ٻاٽي ڪلاوڻ

(متي 21:13-14؛ لوقا 17:9-10؛ يوحنا 14:6)

<sup>30</sup> ٻيچي ميليوڙا سنت پاڇا آيا هانَ ٻريو يسوع نِي او شجو ڪئين سُٿايو جڪو اُوئون ڪينو هانَ منكون نِي شيڪايو هتو. <sup>31</sup> ٻيچي ٻريو يسوع اُوئون نِي ڪهيو ڪم، ”هالو تو آبي ڪي هيڪلپاٽي جگها ڏيشا هالون جيٽ ڪئين آروم ڪرون.“ ڪيونڪه تموم گهڻا منڪ ٻريو يسوع ڪيدي اوتا ايٿي ري ڪري اُوئون نِي ٻاٽي ڪاوڻ رو نيم پي ڪونهي ملنو. <sup>32</sup> ٻيچي او ٻيٽي ۾ چڙهي هيڪلپاٽي جگها ڏيشا ڳيا.

<sup>33</sup> تموم گهڻي منڪون اُوئون نِي جاوتي ڏينا هانَ اولڪيا. ٻيچي شجائي منڪ شهر شون نڪري آيا هانَ ناشي اُوئون شون پيل اُوئي جگها تي ڀڳا جيٽ او جاوتا پڙيا. <sup>34</sup> جڏي ٻريو يسوع ٻيٽي شون اُتريو هانَ اُوئي تموم گهڻا منڪ ڏينا، تو اُوئون تي دايا آئي، ڪيونڪه او اُوئون رڍون آئي ڪار هتا جڪون رو ڪو پي ڌراڙ ني هووي. ٻيچي او اُوئون نِي تموم گهڻي باتون شيڪاوڻ لاگو. <sup>35</sup> جڏي ڏن آٿوئڻ آٿو هتوم، تو ٻريو يسوع را چيلا اُوئي ڪيدي آيا هانَ ڪهيو ڪم، ”ايت تو رڻ پت هِي هانَ رات پي هوئڻ آئي هِي.“ <sup>36</sup> ايٿي ري ڪري ٿي شجي منڪون نِي موڪل ڏينوم، تو آشي پاشي ري گون هانَ بني ۾ جائي آڀري شارو ڪاوڻ پيئڻ رو بندوبست ڪري.“ <sup>37</sup> پڻ ٻريو يسوع اُوئون نِي ڪهيو ڪم، ”تي آڀ ايئون نِي ڪاوڻ ري شارو ڪئين ڏينوم.“ چيلون ٻلتي ڏيني ڪم، ”ڪي مهِي جائي بي سئو چونڊي ري شڪون ري ٻاٽي مول لي ائون هانَ ايئون نِي ڪلائون؟“ <sup>38</sup> ٻريو يسوع اُوئون شون پوچو ڪم، ”تون ڪيدي ڪترِي ٻاٽي هِي؟ جائي جوئو.“ اُوئون پوچي سُٿايو ڪم، ”پونج ٻاٽي هانَ بي مچي.“ <sup>39</sup> ٻيچي ٻريو يسوع آڀري چيلون نِي ڪهيو ڪم، ”شجي منڪون را تولا نائو هانَ اُوئون نِي ساوي گاش تي پيشاڙو.“ <sup>40</sup> ٻيچي منڪ سئو سئو هانَ پنجاه پنجاه ري تولون ۾ بينا. <sup>41</sup> ٻيچي ٻريو يسوع پونج ٻاٽي هانَ بي مچي لي آڪاش ڏيشا جويو هانَ اُوئون ري شارو برڪت مونگي. ٻيچي او ٻاٽي پونگي چيلون نِي ڏيني ڪه او منڪون نِي ڏي، ايٿي نموني اُوئي مچي پي شجي منڪون نِي ڏيني. <sup>42</sup> شجون منڪون ڏنو ڪري ٻاٽي ڪاڏي. <sup>43</sup> ٻيچي چيلون بچوڙي نُڪڙون هانَ مچيون را ٻارهي توڪرا پري ڪنيا. <sup>44</sup> جڪون منڪون ٻاٽي ڪاڏي اُوئون ۾ رگو آڏمي پونج هزار هتا.

## ٻريو يسوع رو پوٿي تي بيوڻ

(متي 22:14-33؛ يوحنا 16:6-21)

<sup>45</sup> ٻيچي اُوئيچ تيم ٻريو يسوع آڀري چيلون نِي آڀ شون پيل ٻيٽي ۾ چاڙهي ڍنڍ ري اُوئي پاشي بيت صيدا شهر ڏيشا ميليا هانَ ٻيچي منڪون نِي جاوڻ ري موڪل ڏيني. <sup>46</sup> منڪون نِي ميلڻ شون ٻيچي آڀ هيڪلو جبل تي پراڻا ڪرڻ ڳيو. <sup>47</sup> جڏي شام هوئي، تو ٻريو يسوع هيڪلو ڍنڍ ري ڪپ تي هتو هانَ ٻيٽي ڍنڍ ري بچ ۾ هتي. <sup>48</sup> اُوئي ڏينو ڪه چيلا سوملي بائيري ري ڪري تموم گهڻي محنت شون ٻيٽي هلاوي پڙيا. ٻيچي ڏن اڱڻ شون پيل ٻريو يسوع پوٿي تي ٻني اُوئون ڪيدي آيو. او اُوئون ري پاشي شون لنگهڻ آٿو هتوم. <sup>49</sup> جڏي چيلون اُوئي نِي پوٿي تي بيتو ڏينوم، تو او شمجها ڪه آي ڪو پوٿو هِي هانَ او رڙي ڪرڻ لاڳام. <sup>50</sup> ڪيونڪه شجائي اُوئي نِي ڏيڪي پيشاڙڻ لاڳا. پڻ ٻريو يسوع يڪدم ڪهيو ڪم، ”پيشاڙو ني، دلجا

کروم هُون هون۔“ 51 پچي جڏي پريو يسوع پيڙي ۾ بينو، تو بائبرو يڪدم بند هوئي گيو۔ آي جوئي چيلا تموم گهڻا حبرون هويا۔ 52 بيشڪ اُونون باتيون آلو پرچو ڏينو هتوم تو پي او شمعهي ڪونهي شگهيا ڪيونڪه اُونون را من ڪانا هوئي گيا هتا۔

### پريو يسوع را گنيسرت ۾ پرچا

(متي 14:34-36)

53 پچي پريو يسوع هان اُوني را چيلا ڊنڊ پار ڪري گنيسرت ري علائقي ۾ پڳا هان اُونون پيڙي ني ڪپ تي بونڊي۔ 54 جڏي او پيڙي شون اُترپا، تو اوڻ ري منڪون پريو يسوع ني اولڪيو۔ 55 منڪون اُونيج تيم سجي علائقي ۾ چارني پاشي جائني پريو يسوع ري اوڻ ري باري ۾ شجون ني سُٿايو۔ پچي جيت پي پريو يسوع گيو اوڻ منڪ آبرا بيمار جهوڻيون ۾ ڪڙائي اُوني ڪڍي لي آيا۔ 56 پريو يسوع شهرون هان گون ۾ جيت پي جاتو اوڻ منڪ آبرا بيمار لائي مارگ ۾ راکتا هان منتون ڪري ڪيتا ڪم، ”مهروني ڪري آڀري گاپون ري پلي ني هات لگاڻ ڏيو۔“ پچي جڪي بيمار پريو يسوع ري گاپون ني هات لگايو، او شاجو هوئي گيو۔

### باپ ڏاڏون را ريت رواج

(متي 15:1-9)

7 1 پچي فريسي منڪ هان ڌرمي گرو يروشلم شهر شون پريو يسوع ڪڍي آيا۔ 2 اُونون ڏينو ڪه پريو يسوع را ڪئينڪه چيلا ٻاتي ڪاوڻ شون پيل آبرا هات ڪونهي ڌوتا۔ 3 ڪيونڪه فريسي منڪ هان سچائي يهودي آڀري باپ ڏاڏون ري ريت تي اُترپي توڻي ٻاتي ڪونهي ڪاوتام جنري توڻي او خاص نموني آبرا هات ني ڌوئي۔ 4 او شهر شون لايوڙي شيون ريت تي ڌوئي ڪاوتام۔ او بيچي تموم گهڻي ريت رواج تي بيتام جهڙي نموني نيڪر هان گلم خاص نموني شون ڌوئي۔

5 ايڻي ري ڪري فريسي منڪون هان ڌرمي گروئون، پريو يسوع شون پوچو ڪم، ”تونرا چيلا باپ ڏاڏون ري ريت رواج تي ڪيئون ڪونهي بيتا هان او ٻاتي ڪاوڻ شون پيل آبرا هات ڪيئون ڪونهي ڌوتا؟“ 6 پريو يسوع اُونون ني ڪهيو ڪم، ”يسعياھ نبي تون نڪون ري باري ۾ پيل شون چتو سُٿايو هي ڪم،

’آي قوم موڏي شون تو مهاري عزت ڪري هي،

پڻ اُونون را من مهني شون تموم گهڻا الگا هي۔

7 او اجائي مهاري پگني ڪري هي،

ڪيونڪه او منڪون را ناهيوڙا حڪم ايئون شيڪاوي هي،

جهڙا او پرميشور را حڪم هووي۔‘

<sup>8</sup> ٿي ايشور ري حُڪمون ري جگها تي،

انسون ري ناهيوڙي ريت رواج تي بو هو۔“

<sup>9</sup> پرپو يسوع اوتون ني اي پي كهيو ڪم، ”ٿي آيري ناهيوڙي ريت رواج تي بيوڙ ري شارو ايشور را حُڪم چوڙو هو۔<sup>10</sup> جون موسي ري شاستر ۾ حُڪم هي ڪم، ’آيري ما باپ ري عزت ڪر هان جڪو پي آيري ما باپ ني برو پلو ڪشي، تو او ضرور ماريو جاشي۔‘<sup>11</sup> پڻ ٿي منڪون ني شيڪائو هو ڪم، ’جڏي ٿونري ما باپ ني ڪي شي ري ضرورت هووي، تو ٿي ڪو ڪم، ’مهني او ايشور ري نون ري ڪي هي۔‘<sup>12</sup> ايئي نموني ٿي اوتون ني آيري ما باپ ري شيوا ڪرڻ ڪونهي ڏيتا<sup>13</sup> هان آيري ريت رواج ري ڪري ايشور را حُڪم توڙو هو هان اهڙا تموم گهڻا ڪوم ڪرو هو۔“

### انسون ني پليت ڪرڻ آئي شيون

(متي 20-10:15)

<sup>14</sup> پچي پرپو يسوع منڪون ني پڙي آپ ڪيڏي اٿائي كهيو ڪم، ”ٿي مهاري بات ذهيون ڏي شُڻو هان سمجهو۔<sup>15</sup> جڪو شي باهر شون اندر جاوي هي، او انسون ني پليت ڪونهي ڪرتي پڻ جڪو شي انسون ري من شون نڪري هي، اوج انسون ني پليت ڪري هي۔“<sup>16</sup> [شُڻڻ آڻو سمجهي رو۔]

<sup>17</sup> جڏي پرپو يسوع منڪون ني چوڙي گهري گيو، تو اوتو ري چيلون پوچو ڪم، ”مهوني شُڻائو ڪه ايئي مثال رو مطلب ڪي هي؟“<sup>18</sup> اوتو بلتي ڏيني ڪم، ”ڪي، ٿي پي آجون توڙي ڪونهي سمجهو؟ ڪي ٿوني خبر ڪونهي ڪه جڪو ڪئين انسون کاوي هي، او اوتو ني پليت ڪونهي ڪري،<sup>19</sup> ڪيونڪه او انسون ري من ۾ نام پڻ پيت ۾ جاوي هي هان او پيت شون هوئي باهر نڪري هي۔“ آي بات ڪئي پرپو يسوع کاوڙ ري شجي شيون جلال ڪري چوڙي۔<sup>20</sup> پچي پرپو يسوع كهيو ڪم، ”جڪو ڪئين انسون ري من شون نڪري هي، اوج انسون ني پليت ڪري هي۔<sup>21</sup> ڪيونڪه انسون ري من شون ڪنا خيال نڪري هي جهڙو ڪم، بچڙائي، چوري، خون،<sup>22</sup> زنا، لالچ، بچڙائي، ننگي، لوقرائي، شالم، گلام، ٻڌائو هان بي وقوفي۔<sup>23</sup> آي شجي باتون انسون ري من شون نڪري انسون ني پليت ڪري هي۔“

### ڪنعاني لڳائي رو وشواس

(متي 28-21:15)

<sup>24</sup> پچي پرپو يسوع اوڻ شون بئي صُور شهر ري هيڪي علائقي ۾ گيو۔ اوڻ او هيڪي گهر ۾ گيو هان اوتو ري مرضي هتي ڪه اوتو ري اوڻ ري خبر ڪيني پي ني پڙي ڪه او ايت هي، پڻ ايئون ڪونهي هويو۔<sup>25</sup> اوڻ هيڪ لڳائي هتي جڪي ري نڪي چوڪري ني پوت لاگوڙو هتو، جڏي اوتو ني خبر پڙي، تو او اوتيج تيم پرپو يسوع ڪيڏي آئي هان اوتو ري پگون ۾ ڪري۔<sup>26</sup> او لڳائي يهودي قوم ري ڪونهي هتي پڻ او بيچي قوم ري هتي، او سوري صوبي ري فنيڪي علائقي شون هتي۔ اوتو پرپو يسوع ني منت ڪري كهيو ڪم، ”مهاري ڏيڪري شون پوت ڪايو۔“

27 پريو يسوع اوني ني كهيو كم، ”پيل بالون ني كاوڻ ڏي ڪيونڪه بالون ري بائي لي ڪتون آگهي نونون آي صحيح ڪونهي.“ 28 ايني تي لڳائي ڪهيو كم، ”اي پريو، آي بات تو صحيح هي، پڻ ڪٿا پي بالون ري تپيل شون ڪريوڙا ٽڪڙا ڪاوي هي.“ 29 تو پريو يسوع ڪهيو كم، ”تي شئي بات ڪي هي، ايني ري ڪري همي ٿو ڄام پوت ٿاري ڏيڪري شون نڪريو رو.“

30 جڏي او لڳائي گهري پڳي، تو ڏينو ڪه اوني ري ڏيڪري موجي تي شوتي هي هان پوت اوني ۾ هائي ڪونهي.

### پريو يسوع رو ٻوڙي ني شاجو ڪرڻ

31 پچي پريو يسوع صور شهر شون بئير هويو هان صيدا شهر ري مارگ هان ڏڪلس علائقي شون هوي گليل ڍنڍ تي آيو. 32 اوٽ ڪينڪه منڪ پريو يسوع ڪيڊي هيڪي ٻوڙي منڪ ني لي آيا جڪو شني نموني بولي ڪونهي شگهتو. او پريو يسوع ني منڪ ڪرڻ لاگا ڪه، ”ايني تي آيو هات راکو، تو آي شاجو هوي جاوي.“ 33 تو پريو يسوع اوني ني منڪون شون هيڪي پاشي لي گيو هان آيري اونگڙي اوني ري ڪونون ۾ گهائتي هان آيو ٿوڪ اوني ري زبون تي لڳايو. 34 پچي پريو يسوع آڪاش ڏيشا جويو هان نساڪو نوڪي اوني منڪ ني ڪهيو ڪه، ”افتح“ يعني ”کلي جا.“ 35 ايني تي اوني را ڪون يڪدم شاجا هوي هان زبون پي کلي گئي هان او چتو ٻولڻ لاگو. 36 پريو يسوع منڪون ني حڪم ڏينو ڪه، ”آي بات ڪيني پي ني شٽايا.“ پڻ پريو يسوع جترو منڪون ني پاليو اترج ائون جائي جيت ڪيٽ شٽايو. 37 آي بات شئي منڪ تموم گهڻا حيرون هوي هان ڪيوڻ لاگا ڪه، ”پريو يسوع تموم گهڻا شٽا ڪوم ڪينا هي. او ٻوڙون ني شٽن هان گونگون ني ٻولڻ ري طاقت ڏي هي.“

### چار هزار منڪون ني ٻائي ڪلاوڻ

(متي 15: 32-39)

8<sup>1</sup> ائون ڏنون ۾ هيڪ گهمرو پڙي تموم گهڻا منڪ پريو يسوع ڪيڊي آي پيڙا هوي. ائون ڪيڊي ڪاوڻ ري شارو ڪنين ڪونهي هتو، ايني تي پريو يسوع آيري چيلون ني آب ڪيڊي اٿائي ڪهيو ڪه، 2 ”مهني ائون منڪون تي دايا آوي هي، ڪيونڪه آي تينون ڏنون شون مهني پيڙا هي هان ائون ڪيڊي ڪاوڻ ري شارو ڪنين ڪونهي بچو. 3 جي هون ائون ني بؤڪيا گهري ميلون، تو آي منڪ مارگ ۾ ڪري جاشي ڪيونڪه ائون ۾ گهڻا الگي پون شون آيوڙا هي.“ 4 ايني تي چيلون ڪهيو ڪه، ”ايني رڻ پت ۾ ڪٺ اتري منڪون ري شارو اتري ٻائي ڪيٽ شون لي آوي؟“ 5 پريو يسوع پوچو ڪه، ”تون ڪيڊي ڪتري ٻائي هي؟“ ائون بلتي ڏيني ڪه، ”شات ٻائي.“ 6 پچي پريو يسوع منڪون ني هينا بيشڻ رو حڪم ڏينو. پچي اوني شات ٻائي لي ايشور رو شڪر ڪيو. پچي ٻائي پونگي چيلون ني ڏيتو گيو هان او شجون منڪون ني ڏينا گيا. 7 ائون ڪيڊي ڪنين نڪي مچي پي هتي. پريو يسوع ائون ري شارو برڪت مونگي هان چيلون ني ڪهيو ڪه، ”آي پي منڪون ني ڏينو.“ 8 جڏي شجون منڪون ڏنو ڪري ٻائي ڪاڏي، تو پچي چيلون بچوڙي ٽڪڙون را شات توڪرا پريا. 9 ٻائي ڪاوڻ آلا اندازن چار هزار منڪ هتا.

پچي پريو يسوع منڪون ني موڪل ڏيني 10 هان اويج تيم او آب چيلون پيڙو پيڙي ۾ چڙهي دلمنوتا علائقي ڏيشا گيو.

### فريسيون رو پريو يسوع ني آزماوڻ

(متي 4:16)

11 اوت ڪئينڪه فريسي منڪ پريو يسوع ڪيڊي آيا هان اوئي شون بحث ڪرڻ لاڳا. اوئون آزموتو ليون رڳي شارو ڪهيو ڪم ”مهوني ڪو اهڙو نئون بنا جڪي شون خبر پڙي ڪه تُو آي ڪوم ايشور ري طرفون ڪري هي.“ 12 تو پريو يسوع نساڪو نوڪي ڪهيو ڪم ”ايئي زموني را منڪ نئون جوڻڻ ري شارو ڪيون ڪري هي؟ هون توني شاجي ڪونه هون ڪه ايئون ني ڪو پي نئون بتايو ڪونهي جاوي.“

13 پچي او اوئون ني اوڻج چوڙي آبري چيلون پيڙو پيڙي ۾ چڙهي دنيد ري بيچي پاشي گيو.

### فريسيون هان هيروديس شون هوشيار ڪرڻ

(متي 12:5:16)

14 جاوتي بلا چيلا آب پيڙي بائي ليون بونري گيا هان پيڙي ۾ اوئون ڪيڊي رگو هيڪج بائي هتي. 15 پريو يسوع اوئون ني حڪم ڏينو ڪم ”فريسي منڪون هان هيروديس ري ڪمير شون هوشيار رهيا.“ 16 ايئي تي چيلا آبت ۾ بحث ڪرڻ لاڳا ڪم ”اوئي آيون ني ايئي ري ڪري ڪهيو هي، ڪيونڪه آبي بائي ڪونهي لي آيا.“ 17 پريو يسوع سمجهي گيو ڪه او ڪهڙي باتون ڪري پڙيا. ايئي ري ڪري اوئي ڪهيو ڪم ”تي آبت ۾ بحث ڪيون ڪرو هو ڪه مهون ڪيڊي بائي ڪونهي؟ ڪي تي آجون توڻي ڪونهي سمجها هان خبر ڪونهي؟ ڪي تي من را ڪنور هويا را؟ 18 تونري اونڪي تو هي، پڻ ڏيڪتا ڪونهي، تونرا ڪون تو هي، پڻ شئتا ڪونهي. ڪي توني ياد ڪونهي، 19 جڏي مهني پونج بائي پونگي پونج هزار منڪون ني ڪلائي هتي، تو تون بچوڙي ٽڪڙون را ڪترا توڪرا پريا هتا؟“ اوئون بلتي ڏيني ڪم ”بارهي.“ 20 پريو يسوع پڙي پوچو ڪم ”جڏي مهني شات بائي پونگي چار هزار منڪون ني ڪلائي هتي، تو اوئي تيم تون بچوڙي ٽڪڙون را ڪترا توڪرا پريا هتا؟“ اوئون بلتي ڏيني ڪم ”شات.“ 21 پريو يسوع ڪهيو ڪم ”ڪي تي آجون پي ڪونهي سمجهتا؟“

### پريو يسوع رو اونڌي ني شاجو ڪرڻ

22 پچي پريو يسوع هان اوئي را چيلا بيت صيدا شهر ۾ آيا. اوت ڪئينڪه منڪ هيڪي اونڌي ني پريو يسوع ڪيڊي لي آيا هان منت ڪري ڪيون لاڳا ڪم ”ايئي اونڌي ني هات لگائي شاجو ڪرو.“ 23 تو پريو يسوع اونڌي ني هات شون جهالي شهر شون باهر لي گيو هان آبرو ٿوڪ اوئي ري اونڪيون تي لگايو هان آبرو هات اوئي تي راڪيا. پچي اوئي شون پوچو ڪم ”ڪي تُو ڪئين ڏيڪي هي؟“ 24 اوئي شومهو جوئي ڪهيو ڪم ”هون منڪون ني بيتا ڏيڪون هون، پڻ او مهني بٽون آلي ڪار لاڳي هي.“ 25 پچي پريو يسوع پڙي آبرو هات اوئي ري اونڪيون تي راڪيو، تو اوئي ري نظر شاجي هوئي گئي هان او چتو جوڻڻ لاڳو. 26 پچي پريو يسوع اوئي ني ڪهيو ڪم ”تُو پاچو ايئي شهر ۾ ني جا، پڻ شندو آبري گهري جا.“

پطرس ري پريو يسوع زي باري ۾ گواهي

(متي 20:13-16؛ لوقا 21:18-9)

27 جڏي پريو يسوع قيصر يا فلپي شهر ري علائقي ڏيشا جاتو پٿرو، تو مارگ ۾ اوني آيري چيلون شون پوچو ڪم، ”منڪ مهاري باري ۾ ڪي ڪي هي، هون ڪٿ هون؟“ 28 ائون بلتي ڏيني ڪم، ”ڪينڪ منڪ ڪي هي ڪه تُو پوتر سنون ڏيوڻ آلي يوحنا ري رُوپ ۾ آيوڙو هي ڪين ڪي هي ڪه تُو ايلياھ نبي هي جڪو اوڻ آلو هتو هان ڪين ڪي هي ڪه تُو پيجي نبيون ۾ ڪو هيڪ هي.“ 29 پريو يسوع ائون شون پوچو ڪم، ”پڻ ٿي مهاري باري ۾ ڪي ڪو هو ڪه هون ڪٿ هون؟“ ايني تي شمعون پطرس بلتي ڏيني ڪم، ”تُو مسيح هي.“ 30 پيجي پريو يسوع ائون ني حڪم ڏي ڪهيو ڪم، ”تي مهاري باري ۾ ڪيني پي ني سٽايا.“

پريو يسوع ري آيري موت ري اگڪتي

(متي 28:21-16؛ لوقا 27:22-9)

31 پيجي پريو يسوع آيري چيلون ني شيڪاوڻ لاگو ڪم، ”آي ضرور هي ڪه هون منس پتر تموم گهٽا ڏڪ ڏيڪون هان يهودي اگروڻ، ايشور را موتا پوجاري هان ڌرمي گرو مهني، ني مني هان مهني ماري چوڙي پڻ هون تيجي ڏن موٽوڙون شون جيتو هوئي جائين.“ 32 پريو يسوع آي بات آيري چيلون ني جتي ڪري سٽائي. تو پطرس اوني ني هيڪي پاشي لي گيو هان ڪهيو ڪم، ”اهڙي باتون ني ڪرو.“ 33 پيجي پريو يسوع آيري چيلون ڏيشا پاچل قوري جويو هان پطرس ني ڌڙڪو ڏي ڪهيو ڪم، ”اي شبطون، مهاري اونڪيون شون ٽلي جام ڪيونڪه ٿارو آي خيال ايشور ري طرفون نام پڻ انسون ري طرفون هي.“

پريو يسوع رو چيلو هوڻ رو شرط

(متي 39:10، 26:24-16؛ لوقا 26:23-9، 33:17؛ يوحنا 25:12)

34 پيجي پريو يسوع منڪون ني هان آيري چيلون ني آپ ڪيدي اٿائي ڪهيو ڪم، ”جي ڪيري مرضي هي ڪه مهاري لاري آوي، تو او آيري مرضي ني چوڙي هان مهاري شارو آيري سولي ڪي يعني آيري جان ڏيوڻ ري شارو تيار ري، تو پيجي او مهاري لاري آي شگهي هي.“ 35 ڪيونڪه جڪو پي آيري حياتي بچاشي، تو او اوني امر جيون ني گماشِي، پڻ جڪو مهاري ڪري هان خوشي ري خبر ري ڪري آيري آي حياتي گماشِي، تو اوني ني امر جيون ملشي. 36 جي ڪو منڪ شجي دنيا پيڙي ڪري پڻ آيري حياتي گماوي، تو اوني ني ايني رو ڪهڙو فائدو؟ 37 انسون شجو ڪين ڏي آيري حياتي پاچي لي ڪونهي شگهتو. 38 ايني زموني را منڪ ايشور شون وفادار ڪونهي هان پاي هي هان جي ڪو ائون ۾ رئي مهني شون هان مهاري باتون شون شرماشي، تو جڏي هون منس پتر آيري پتا ري موتي مهما ۾ پوتر فريشتون پيڙو آين، تو اوني ڏن هون پي اوني شون شرمائين.“

9<sup>1</sup> پرئو يسوع چيلون ني كهبو كه، ”هون توني شاجي كونه هون كه كئينك منك جكو ايت ايا هي او اترې توڻي كونهي مري جتري توڻي آپري زندگي ۾ ايشور ري بادشاهي ني قدرت شون اوني ني ڏيكي.“

### پرئو يسوع رو چمتكاري رُوپ

(متي 13:1-17؛ لوقا 9:28-36)

2 چي ڏنون شون پچي پرئو يسوع، بطرس، يعقوب هان يوحنا ني آب پيٽا لي اونچي جبل تي هيڪي پاشي لي گيو. ائون چيلون ري روبرو پرئو يسوع رو رُوپ بدليجي گيو. 3 اوئي را گايا چمڪڻ لاگا هان اڃائي آئي كار اچا هوئي گيا كه دنيا رو ڪو پي ڌوپي اهڙا اچا ڪري كونهي شگهتو. 4 پچي ائون ني موسي هان ايلياھ ڏيڪيجڻ ۾ ايا جكو پرئو يسوع شون باتون ڪرنا پٽيا. 5 بطرس پرئو يسوع ني كهبو كه، ”گرو جي، ڪتري شني بات هي كه مهني ايت هون. ڪيئون ني مهني ايت تين تنبو ڪوڙون، هيڪ تونري شارو، هيڪ موسي ري شارو هان هيڪ ايلياھ ري شارو.“ 6 حقيقت ۾ بطرس ني اي خبر كونهي هتي كه او ڪي ڪي پٽيو، ڪيونڪه او تينئي تموم گهڻا پيناجا هتا. 7 پچي باڏل آني ائون مائي چان ڪي هان باڏل شون آواز آيو كه، ”اي مهارو پيارو ڏيڪرو هي، ٿي ايني ري شٿو.“ 8 جڏي ائون يڪدم چارئي پاشي جويوم تو اوت پرئو يسوع شون ٿال پيجو ڪو پي كونهي هتو.

9 جڏي او جبل شون هيٺا اترتا پٽيا، تو پرئو يسوع ائون ني حڪم ڏينو كه، ”جتري توڻي هون منش پتر موٽوڙون شون جيتو ني هوئون، اترې توڻي تون جكو ڪئين ڏينو هي او ڪيني پي ني شٿايا.“ 10 چيلون پرئو يسوع ري ايني بات ني ياد راکي، پڻ او آبت ۾ ڪيوڻ لاگا كه، ”موٽوڙي شون جيتي هوڻ رو مطلب ڪي هي؟“ 11 پچي چيلون پرئو يسوع شون پوچو كه، ”درمي گرو ڪيئون ڪي هي كه پيل ايلياھ رو اوڻ ضرور هي؟“ 12 ايني تي پرئو يسوع بلتي ڏيني كه، ”ايني ۾ ڪو پي شڪ كونهي كه ايلياھ پيل آسي هان هر هيڪ شني تيار ڪرشي. پڻ ڪيئون شاستر ۾ مهني، منش پتر ري باري ۾ لڪيوڙو هي كه، ’هون تموم گهڻا ڏک ڏيڪين هان منڪ مهني ڪئين كونهي سمجھي؟‘ 13 هون توني كونه هون كه ايلياھ تو آيو رو هان جون اوئي ري باري ۾ لڪيوڙو هي، منڪون اوئي شون جون وڻيو اينوج ڪيو.“

### پرئو يسوع رو چوڪري شون پوت ڪاڍڻ

(متي 14:17-21؛ لوقا 9:37-43)

14 جڏي پرئو يسوع هان تين چيلا باقي چيلون ڪيڍي پاچا آيا، تو ائون ڏينو كه درمي گرو ائون شون بحث ڪري پٽيا هان ائون ري چوڌاري تموم گهڻا منڪ پيٽا هويا هي. 15 اوچتو منڪون پرئو يسوع ني ڏينوم، تو او تموم گهڻا حيرون هويا. او ناشتا اوئي ڪيڍي گيا هان اوئي ني نمسڪار ڪهبو. 16 پرئو يسوع چيلون شون پوچو كه، ”تي درمي گروئون شون ڪهڙو بحث ڪرنا پٽيا؟“ 17 تو منڪون ۾ هيڪي ڪهبو كه، ”گرو جي، هون آيو ڏيڪرو تون ڪيڍي لي آيو هتو، جڪي ۾ گونگو پوت هي ايني ري ڪري اي ٻولي كونهي شگهتو. 18 جڏي پوت آوي هي، تو ايني ني هينو نوڪي

هَي هَانِ مَوْدَي شونِ گوگهي بي هَي هَانِ آي ذونتِ پيشي شيتيجي هي. مهي تاري چيلون ني كهيو هتم، پڻ او پوتِ كاڊي كونهي شگهيا.“  
 19 پرپو يسوع كهيو ڪم ”اي بنا وشواس آئون، هون ڪتري توڻي تون پيڙو رئين هان ڪتري توڻي تونري باتون شئتو رئين؟ ايئي چوڪري ني مهي  
 ڪڍي لي آئو.“ 20 تو او اوني ني پرپو يسوع ڪڍي لي آيا. جڏي پوتِ پرپو يسوع ني ذينوم، تو اوئيج تيم اوني چوڪري ني مروڙيو هان او هينو ڪري  
 دوجن لاگو هان اوني ري مودَي شونِ گوگهي بيون لاگي. 21 تو پرپو يسوع چوڪري ري باب شون پوچو ڪم، ”آي ڪڏي شون ايئون ڪري هي؟“  
 اوني ري باب بلتي ذيني ڪم، ”بالڪپڻ شون. 22 پوتِ چوڪري ني تموم گهڻا گهمرا پوڻي هان باشڏي ۾ نوڪي مارڻ ري ڪوشش پي ڪي هي.  
 مهربوني ڪري مهون تي دايا ڪرو هان جي هوئي شگهي، تو مهوري مدد ڪرو.“ 23 پرپو يسوع اوني ني بلتي ذيني ڪم، ”آي ني ڪي ڪي جي  
 هوئي شگهي، ڪيونڪه جڪو وشواس راڪي هي اوني ري سارو شجو ڪئين هوئي جاوي هي.“ 24 ايئي تي چوڪري ري باب اوئيج تيم زور شون  
 كهيو ڪم، ”هون وشواس راڪون هون، پڻ تو مهارو وشواس پڪو ڪرڻ ۾ مهاري مدد ڪر.“ 25 جڏي پرپو يسوع ذينو ڪم منڪ ناشي ناشي پيڙا  
 هووي پڙيا، تو اوني پوتِ ني دڙڪو ڏي كهيو ڪم، ”اي، پوڙا هان گونگا پوتِ، هون تني حڪم ذينون هون ڪه ايئي چوڪري شون نڪري جا  
 هان ڪڏي پي ايئي ۾ پاچو ني آئي.“ 26 ايئي تي پوتِ رڙ ڪري چوڪري ني مروڙيو هان اوني شون نڪري گيو. چوڪرو بيهوش هوئي گيو هان  
 تموم گهڻي منڪون شمجهو ڪه او مئون رو. 27 پڻ پرپو يسوع اوني رو هات جهالي اناٿيوم، تو او ائي گيو.

28 جڏي پرپو يسوع اوت شون بئير هوئي گهري پگوم، تو اوني ري چيلون هيڪلائي ۾ اوني شون پوچو ڪم، ”مهي اوني پوتِ ني ڪيئون كونهي  
 ڪاڊي شگهيا؟“ 29 پرپو يسوع ائون ني بلتي ذيني ڪم، ”تي اهڙا پوتِ پرائنا ڪرڻ بنا، ڪاڊي كونهي شگهيا.“

### پرپو يسوع ري پڙي آڀري موت ري اگڪتي

(متي 22:17-23؛ لوقا 9:43-45)

30 پڇي پرپو يسوع هان اوني را چيلا اوت شون بئير هويا هان گليل صوبي شون متيا. پرپو يسوع ري مرضي كونهي هتي ڪه ڪيني پي اوني ري آوڻ  
 ري خير پڙي. 31 ڪيونڪه پرپو يسوع آڀري چيلون ني شيڪاوتو پڙيو ڪم، ”هون مُنڻ پتر، منڪون ري حوالي ڪيو جائين. او مهني مارشي پڻ هون  
 تبجي ڏن مونيون شون جيتو هوئي جائين.“ 32 پڻ چيلا ايئي بات رو مطلب كونهي شمجها هان او پوچڻ شون پي پيئاجتا.

### شجون شون موتو ڪڻ هي؟

(متي 18:1-5؛ لوقا 9:46-48)

33 پڇي پرپو يسوع هان اوني را چيلا ڪفرنحوم شهر ۾ آيا. جڏي او گهري پگا، تو پرپو يسوع ائون شون پوچو ڪم، ”تون مارگ ۾ ڪئي بات تي  
 بحث ڪيو هتو؟“ 34 چيلون ڪو پي بلتي ڪونهي ذيني، ڪيونڪه او آيت ۾ آي بحث ڪرتا پڙيا ڪم، ”آپون ۾ شجون شون موتو ڪڻ هي؟“  
 35 تو پرپو يسوع پينو هان بارهون چيلون ني اٿائي كهيو ڪم، ”تون ۾ جي ڪيري موتي هوڻ ري مرضي هووي، تو او شجون شون نينو هوئي

شيواداري هووي-“ 36 پڇي پريو يسوع هيڪي ٻال ني اٿائي اونون ري بچ ۾ اٿايو- پڇي اوئي ني کوڙي ۾ لي اونون ني كهيو ڪم، 37 ”جڪو پي مهاري سارو اهڙي ٻائون ۾ ڪي هيڪي ني قبول ڪري هي، تو سمجهو ڪه او مهني قبول ڪري هي هان جڪو مهني قبول ڪري هي، تو سمجهو ڪه او ايشور ني قبول ڪري هي جڪي مهني مليو هي-“

**جڪو خلاف ڪونهي او پيڙو هي**

(لوقا 9:49-50)

38 پڇي يوحنا كهيو ڪم، ”گرو جي، مهون هيڪي منڪ ني تونري نون شون پوت ڪاڍتي ڏينوم، تو مهون اوئي ني پاليو ڪيونڪه او مهون آئي ڪار تون پيڙو ڪونهي هي-“ 39 ايئي تي پريو يسوع كهيو ڪم، ”اوئي ني پالو ني، ڪيونڪه جڪو مهارو نون لي پرچا ڪري هي، تو مهني او يڪدم خراب ڪئي ڪونهي شگهتو- 40 ايئي ري ڪري جڪو آڀي خلاف ڪونهي، او آڀون پيڙو هي- 41 جڪو پي توني مهارو چيلو سمجهي پوئي رو هيڪ گلاش پياڙي هي، تو هون توني ساڇي ڪونه هون ڪه اوئي ني ايئي رو قل ضرور ملشي-“

**گهمراه ڪراوڻ آئي ري سزا**

(متي 18:6-9؛ لوقا 17:1-2)

42 پڇي پريو يسوع كهيو ڪم، ”جڪو پي مهني تي وشواس راڪڻ آئون، ايئون نبيون ۾ ڪي هيڪي ني گهمراه ڪري هي، تو اوئي ري سارو سُنو آي هوشي ڪه اوئي ري گلي ۾ گهتي رو پڙ بونڊي اوئي ني سموندر ۾ نوڪيو جاوي- 43 جي تارو هات تي شون پاپ ڪراوي، تو اوئي ني باڊي چوڙ، ڪيونڪه بيئون هاتون شون نرگ ري هميشا ري باشڏي ۾ جاوڻ شون سُنو آي هي ڪه تو نونو هوئي شرگ ۾ جاوي- 44 [نرگ ۾ منڪ ٻلتا ريشي هان اوڻ باشڏي ڪڏي پي ڪونهي ٻجهي-] 45 جي تارو پگ تي شون پاپ ڪراوي، تو اوئي ني باڊي اڇلائي چوڙ، ڪيونڪه بيئون پگون شون نرگ ري باشڏي ۾ جاوڻ شون سُنو آي هي ڪه تو مندو هوئي شرگ ۾ جاوي- 46 [نرگ ۾ منڪ ٻلتا ريشي هان اوڻ رو باشڏي ڪڏي پي ڪونهي ٻجهي-] 47 جي تاري اونڪ تي شون پاپ ڪراوي، تو اوئي ني ڪاڍي اڇلائي چوڙ، ڪيونڪه بيئون اونڪيون شون نرگ ري باشڏي ۾ جاوڻ شون سُنو آي هي ڪه تو ڪوڻو هوئي شرگ ۾ جاوي- 48 نرگ ۾ منڪ ٻلتا ريشي هان اوڻ رو باشڏي ڪڏي پي ڪونهي ٻجهي-“

49 جون ٻليدون ني لوڻ لگائي پويتر ڪيو جاوي هي، اوڻيچ نموني هر هيڪ منڪ ني باشڏي شون پويتر ڪيو جاشي- 50 لوڻ تو سُنو هي، پڻ جي اوئي رو شواد ختم هوتو جاوي، تو اوئي ني پڙي ڪيڪر شوادو ڪيو جاشي؟ ايئي ري ڪري تي ساڇا چيلا هوئي ايشور ري مرضي پوري ڪرو هان آڀت ۾ لوڻ جهڙو شواد راڪو هان هيڪي بيڇي شون پريم شون بو-“

## طلاق ني ڏيوڻ ري باري ۾ شيڪاوڻ

(متي 12:1-19؛ لوقا 18:16)

## 10

<sup>1</sup> پڇي پريو يسوع اوت شون بئير هوئي يردن دريا ري بيلوڙي پاشي يهوديا صوبي ري علائقي ۾ گيو. اوت پي تموم گهڻا منڪ اوئي  
 ڪڍي آئي پيڙا هوبا هان پريو يسوع اگي آئي ڪار اوئون ني شيڪاوڻ لاگو. <sup>2</sup> تو ڪينڪه فريسي منڪ پريو يسوع رو آزموتو ليون ري  
 شارو اوئي ڪڍي آيا هان پوڇو ڪه، ”ڪي آي جائز هي ڪه ڪو پي منڪ آپري لگائي ني طلاق ڏي؟“ <sup>3</sup> پريو يسوع اوئون شون پوڇو ڪه، ”ايني  
 ري باري ۾ توني موسي ڪهڙو حڪم ڏينو هي؟“ <sup>4</sup> اوئون ڪهيو ڪه، ”موسي تو موڪل ڏيني هي ڪه آدمي آپري لگائي ني طلاق رو ڪاڱڌ ڏي  
 چوڙي شگهي هي.“ <sup>5</sup> پڻ پريو يسوع اوئون ني ڪهيو ڪه، ”موسي آي حڪم تونري ڪائي من ري ڪري لڪيو هتو. <sup>6</sup> پڻ ايشور انسون ني شروع  
 شون نر هان ناري ناهيا. <sup>7</sup> ايني ري ڪري آدمي آپري ما باب ني چوڙي آپري لگائي پيڙو ريشي.“ <sup>8</sup> پڇي او بئي هيڪ تن هوشي. ايني ري ڪري او  
 بي نام پڻ هيڪ هي <sup>9</sup> ڪيونڪه جڪون ني ايشور جوڙيا هي انسون اوئون ني ڌار ني ڪري.“

<sup>10</sup> جڏي او گهري هتام تو چيلون اوئي بات ري باري ۾ پريو يسوع شون پوڇو. <sup>11</sup> تو اوئي اوئون ني بلتي ڏيني ڪه، ”جڪو پي آپري لگائي ني چوڙي  
 پڇي لگائي شون بيان ڪري هي، تو او زنا ڪري هي <sup>12</sup> هان جڪو لگائي آپري ڏي ني چوڙي بيجو ڏي ڪري هي، تو او پي زنا ڪري هي.“

## پريو يسوع رو ٻالون ني برڪت ڏيوڻ

(متي 15:13-19؛ لوقا 17:15-18)

<sup>13</sup> هيڪ ڏن منڪ آپرا ٻاليا پريو يسوع ڪڍي لي آيا ڪه او اوئون مائي هات راڪي برڪت ڏي پڻ چيلون اوئون ني ڊرڪا ڏينا. <sup>14</sup> آي جوئي پريو  
 يسوع چيلون تي ڪاوڙيو هان ڪهيو ڪه، ”ٻالون ني مهني ڪڍي اوڻ ڏينو هان اوئون ني پالو ني، ڪيونڪه ايشور ري بادشاهي اوئون ري شارو  
 هي جڪو ايشور ٻالون آئي ڪار هي. <sup>15</sup> هون توني شاجي ڪونه هون ڪه جتري توڻي ڪو پي بدليجي ايشور ري بادشاهي ني ٻالون آئي ڪار مني  
 ڪونهي، تو او ايشور ري بادشاهي ۾ ڪڏي پي جائي ڪونهي شگهي.“ <sup>16</sup> پڇي پريو يسوع ٻالون ني آپري ڪوڙي ۾ ليئا هان اوئون مائي هات راڪي  
 برڪت ڏيني.

## شاهوڪار هان ايشور ري بادشاهي

(متي 16:19-30؛ لوقا 18:18-30)

<sup>17</sup> هيڪ ڏن جڏي پريو يسوع مارگ جهالي جاتو پڙيو، تو هيڪ منڪ ناشتو اوئي ڪڍي آيو هان اوئي آگهي گوڏا ڪوڙي پوڇڻ لاگو ڪه، ”گرو  
 جي، ٿي تو نيڪ هو. مهني شنائو ڪه هون ڪي ڪرون ڪه ايشور مهني امر جيون ڏي.“ <sup>18</sup> پريو يسوع اوئي ني ڪهيو ڪه، ”تو مهني نيڪ  
 ڪيون ڪي هي؟ ايشور شون ٿال بيجو ڪو پي نيڪ ڪونهي. <sup>19</sup> تني ايشور ري حڪمون ري خبر تو هي ڪه، خون ني ڪر، زنا ني ڪر، چوري

ني ڪر، ڪوڙي شاڪ ني ڀر، ٺڳي ني ڪر هان آڀري ما باپ ري عزت ڪر۔“<sup>20</sup> ائين تي اُوئي ڪهيو ڪم، ”گرو جي، هون تو ائون شجون  
 حڪمون تي بالڪڻ شون بيتو ائون پڙيو۔“<sup>21</sup> ائين تي پڙيو يسوع اُوئي ڏيشا پريم شون جو يو هان اُوئي ني ڪهيو ڪم، ”اچون پي تي ۾ هيڪي  
 بات ري گهتائي هي۔ تو جا هان آڀري سڄي ملڪيت بيچي اُوئي را پشا غريبن ۾ بلا، تو تني آڪاش ۾ خزونو ملشي هان پچي آني مهاري لاري  
 ني۔“<sup>22</sup> اي بات شئي اُوئي منڪ رو مونڌو اُتري گيو هان پريشون هوئي بوئو گيو، ڪيونڪ او موتو شاهوڪار هتو۔<sup>23</sup> پچي پڙيو يسوع چوڌاري  
 جوئي آڀري چيلون ني ڪهيو ڪم، ”شاهوڪار رو ايشور ري بادشاهي ۾ جاوڻ تموم گهڻو ڏڪيو هي۔“<sup>24</sup> چيلا پڙيو يسوع ري اي بات شئي حيرون  
 هويا۔ ائين ري ڪري پڙيو يسوع پڙي ائون ني ڪهيو ڪم، ”اي بائون، ايشور ري بادشاهي ۾ جاوڻ تموم گهڻو ڏڪيو هي۔“<sup>25</sup> اونڌ رو شئي ري  
 ناڪي ۾ لنگهڻ تو ڏڪيو هي، پڻ شاهوڪار منڪ رو ايشور ري بادشاهي ۾ جاوڻ اُوئي شون پي وڌيڪ ڏڪيو هي۔“<sup>26</sup> جڏي چيلون اي شئيوم  
 تو او تموم گهڻا حيرون هويا هان ڪيون لاگا ڪم، ”تو پچي ڪيني پي مگني ڪونهي ملي۔“<sup>27</sup> پڙيو يسوع ائون ڏيشا ڏهيون شون جوئي ڪهيو  
 ڪم، ”جڪو ڪوم انسون شون ڪونهي هوتا، او ايشور ڪري شگهي هي ڪيونڪ ايشور سجو ڪين ڪري شگهي هي۔“<sup>28</sup> تو پطرس ڪهيو  
 ڪم، ”جوئو، مهون آڀرو سجو ڪين چوڙي هان تونرا چيلا هوئي تون لاري بون پڙيا۔“<sup>29</sup> پڙيو يسوع ڪهيو ڪم، ”هون توني ساجي ڪونه هون ڪ  
 جڪو پي مهاري ڪري هان خوشي ري خبر ري ڪري، آڀرو گهر، پائي، بينون، ما باپ جون آڀرا اولاد هان بني بارو چوڙي هي،<sup>30</sup> جي اُوئي تي  
 ظلم پي هوئي، تو اُوئي ني ني رگو ائيني جگت ۾ سئو گهرا گهر، پائي بينون، ما باپ، اولاد هان بني بارو ملشي، پڻ اوڻ آئي جگت ۾ امر جيون  
 پي ملشي۔“<sup>31</sup> تموم گهڻا منڪ جڪو هتون آگهي هي، او لاري هوئي هان جڪو لاري هي او آگهي هوئي۔“

### پڙيو يسوع ري تيجو گهمرو آڀري موت ري اگڪتي

(متي 19:20-17؛ لوقا 18:31-34)

<sup>32</sup> جڏي پڙيو يسوع هان اُوئي را چيلا يروشلم شهر ڏيشا جاوتا پڙيا، تو او ائون آگهي جاوتو پڙيو۔ چيلا حيرون هتا هان جڪو منڪ لاري هتا، او  
 بيناجڻ لاگا۔ پچي پڙيو يسوع آڀري بارهون چيلون ني ڌار لي جائي ائون باتون ري باري ۾ سڻايو جڪو هوڻ آئي هتي ڪم،<sup>33</sup> ”سڻو آبي يروشلم  
 ڏيشا هالون پڙيا جيٽ منڪ مهني منس پتر ني، ايشور ري موتي پوجاريون هان ڌرمي گروئون ري حوالي ڪرشي۔ او مهاري موت رو فيصلو ڪرشي۔  
 پچي او مهني بيچي قومون ري حوالي ڪرشي۔“<sup>34</sup> منڪ مهني تي ننڍي ڪرشي هان مهني تي ٽوڪشي۔ او مهني چاڪون هئي ماري چوڙشي، پڻ

هون تيجي ڏن جيتو هوئي جائين۔“

## يعقوب هان يوحنا ري منت

(متي 20:28-28)

<sup>35</sup> پڄي زبدي را بيئي ڏيڪرا يعقوب هان يوحنا پريو يسوع ڪيڏي آيا هان منت ڪري ڪهيو ڪم ”گرو جي، مهوري مرضي هي ڪم مهني تون شون جڪو ڪئين مونگوم تي او مهوري شارو ڪرو.“ <sup>36</sup> پريو يسوع اوتون شون پوچو ڪم ”تونري ڪهڙي مرضي هي ڪم هون تونري شارو ڪي ڪرون؟“ <sup>37</sup> اوتون ڪهيو ڪم ”جڏي تي موتي مهما شون بادشاهي ڪروم تو مهون م هيك تونري شاجي هان بيجو ڪاڀي پاشي پيشي.“ <sup>38</sup> پريو يسوع اوتون ني ڪهيو ڪم ”تونري خبر ڪونهي ڪم تي ڪي مونگو پڙيا. ڪي تي ڏڪون رو او پيالو پيني شگهو هو جڪو هون پيئڻ آڻو هون، ڪي تي او پويتر سنون لي شگهشو جڪو مهني ليونو هي؟“ <sup>39</sup> اوتون بلتي ڏيني ڪم ”هاوي، مهني ايئون ڪري شگهون هون.“ پريو يسوع اوتون ني ڪهيو ڪم ”شاجيلي، جڪو پيالو هون پيئڻ آڻو هون، او تي پيشو هان جڪو پويتر سنون هون ليون آڻو هون او تي ليشو.“ <sup>40</sup> پڻ ڪيئي آڀري شاجي جون ڪاڀي پاشي پيشاڙڻ مهارو ڪوم ڪونهي. او جگهائون اوتون ري شارو هي جڪون ري شارو ناهيوڙي هي.“ <sup>41</sup> جڏي باقي ڏشون چيلون يعقوب هان يوحنا ري اي بات شئي، تو اوتون تي ڪاوڙيا. <sup>42</sup> پڻ پريو يسوع اوتون شجون ني هيلو ڪري ڪهيو ڪم ”تونري خبر هي ڪم بيجي قوم را اگروڻ اوتون تي حڪم هلاوي هي هان اوتون اگروڻون تي اوتون ري موتي وزيرون رو اختيار هي.“ <sup>43</sup> پڻ تون م ايئون ني هوڻن ڪيي. تون م ڪيري موتي هوڻن ري مرضي هووي، تو او شجون شون نينو هوئي شيواداري هووي. <sup>44</sup> تون م جي ڪيري مرضي هووي ڪم او اگروڻ هووي، تو او شجون رو غلوم هووي. <sup>45</sup> ڪيونڪه منش پتر يعني هون ايئي ري ڪري ڪونهي آيو هون ڪم بيجا مهاري شيوا ڪري پڻ هون ايئي ري ڪري آيو هون ڪم هون آڀ بيجون ري شيوا ڪرون هان تموم گهڙي منڪون ني مگتي ڏيوڻ ري شارو آڀ بليدون هوئون.“

## پريو يسوع رو اونڌي ني شاجو ڪرڻ

(متي 29:34-35؛ لوقا 18:35-43)

<sup>46</sup> پڄي جڏي پريو يسوع آڀري چيلون هان تموم گهڙي منڪون پيڙو پريخو شهر شون هوئي جاوتو پڙيوم، تو مارگ ري هيڪي پاشي هيڪ اونڌو فقير پنتو پڙيو. اوتني رو نون برتمائي هتو يعني ”تمائي رو ڏيڪرو.“ <sup>47</sup> جڏي اوتني شئيو ڪم يسوع ناصر اي شون جاوي پڙيوم، تو اوتني رڙ ڪري ڪهيو ڪم ”اي يسوع، دائود بادشاه را اولاد، مهني تي دايا ڪرو.“ <sup>48</sup> ايئي تي منڪ اوتني ني دڙڪا ڏي مات ڪراوڻ لاگام، پڻ او آجون پي زور شون ڪيوڻ لاگو ڪم ”اي دائود بادشاه را اولاد، مهني تي دايا ڪرو.“ <sup>49</sup> تو پريو يسوع ابي رهيو هان ڪهيو ڪم ”اوتني ني مهني ڪيڏي لي آڻو.“ پڄي اوتون اونڌي ني هيلو ڪيو هان اوتني ني ڪهيو ڪم ”همت راڪ. ائي، پريو يسوع تني آڻايو هي.“ <sup>50</sup> اي شئي اوتني آڀري چادر اوتاري اچلائي هان تپ ڏي ائي پريو يسوع ڪيڏي آيو. <sup>51</sup> پريو يسوع اوتني شون پوچو ڪم ”شٽام هون تاري شارو ڪي ڪرون؟“ اوتني ڪهيو ڪم ”اي پريو،

مهاري اونكيون ري ديد پاچي آوي. “52 پرئو يسوع اوني ني كهيو كم، ”جا، تني تاري وشواس شاجو كينو هي.“ او يكدم جوئو لاگو هان پرئو يسوع رو چيلو هوئي، اوني لاري بيون لاگو.

پرئو يسوع رو بادشاه آئي كار يروشلم ۾ جاوڻ

(متي 11-1:21؛ لوقا 19:28-40؛ يوحنا 12:12-19)

# 11

1 جڏي پرئو يسوع هان اوني را چيلا يروشلم شهر ري نيڙا زيتون ري جبل تي بيت فگي گون هان بيت عينا گون ري نيڙا ڳام، تو پرئو يسوع آبري چيلون ۾ بيئون ني ميليا 2 هان كهيو كم، ”شوملي گون ۾ جائو. جڏي تي اوت ڳوشوم، تو اوت هيڪ گڏيو بادوڙو ڏيڪشو جڪي تي آجون توڻي ڪو پي سوار ڪونهي هويو. او ڪولي مهني ڪيڏي لي آتو. 3 جي ڪڻ ٿون شون پوچي ڪم، ”آي ڪي ڪرو هو؟“ تو ڪهيا ڪم، ”پرئو ني ايئي ري ضرورت هي.“ تو اويج تيم ڏي ميلشي.“

4 پچي او بيئي چيلا گيا هان ائون گڏني ني گهتي تي بادوڙو ڏينو. جڏي او ڪولڻ لاگام 5 تو اوت ايوڙي منڪون پوچو ڪم، ”آي ڪي ڪرو هو؟ ايئي ني ڪيون ڪولو هو؟“ 6 تو ائون اوج ڪهيو جون پرئو يسوع ائون ني ڪهيو هتو. پچي ائون گڏيو لي جاوڻ ڏينو. 7 پچي او گڏني ني پرئو يسوع ڪيڏي لي آيا هان آيا گيا اوني ماڻي ڍاڙيا. پچي پرئو يسوع اوني تي سوار هويو. 8 تموم گهتي منڪون اوني ري عزت ري سارو آيا گيا مارگ تي بچايا هان بني شون بٿون ري ٽائي باڊي مارگ تي بچاوتا گيا. 9 جڪو منڪ پرئو يسوع آگهي لاري هتام او زور شون نارا هٿ لاگا ڪم.

”ايشور ري جئي جئي ڪار،

ڏن هي او جڪو پرميشور ري نون شون آوي هي.

10 پرميشور ري برڪت ايئي بادشاه تي هي

جڪو آبري ڏاڏي دائود ري جگها تي بادشاهي ڪرشي.

شُرگ ۾ ايشور ري ٻڌائي هوڙي.“

11 پرئو يسوع يروشلم شهر ۾ ڳو هان او ايشور ري گهر ۾ گيو هان اوت چارئي پاسي هر هيڪ شئي ني ڏيئي. پچي او آبري بارهون چيلون پيڙو بيت عينا گون ڏيما گيو ڪيونڪ، شام هوڻ آي هتي.

پريو يسوع رو انجیر ري بن ني پتن

(متي 19:18-21)

12 پيجي ڏن جڏي پريو يسوع بيت عنيا گون شون پاڇو آوتو پڙيو، تو مارگ ۾ اُوئي ني بُڪ لاڳي. 13 اُوئي الڳي پون شون انجیر رو شائو بڻ ڏينوم، تو اوئي ڏيشا ڦل جوئڻ گيو. جڏي او اُوئي ري نيڙو گيو، تو اُوئي ۾ پونون شون ٽال ڪئين ڪونهي هتوم، ڪيونڪه انجیر ري مُند ڪونهي هتي.

14 پريو يسوع اُوئي بن ني ڪهيو ڪه، ”آج شون پيجي ٿي ۾ ڪڏي پي ڦل ڪونهي لاڳي.“ آي بات اُوئي ري چيلون پي سُڻي.

ايشور ري گهر شون واپاري ڪاڍڻ

(متي 17:12-21؛ لوقا 19:45-48؛ يوحنا 2:13-22)

15 جڏي پريو يسوع هان اُوئي را چيلا يروشلم ۾ آيا، تو او ايشور ري گهر ۾ گيو. پيجي او اُوئون منڪون ني باهر ڪاڍڻ لاڳو جڪو اوٽ پلیدون ري شارو جنارون رو ڪاروبار ڪرتا پڙيا. اُوئي رُپيا متاوت آئون را تيبيل هان ڪهوتري بيچڻ آئون را شندل اُونڌا ڪري چوڙيا 16 هان جڪو منڪ ايشور ري گهر شون سيمون لي آوتا هان لي جاوتا پڙيا اُوئون ني پي پالبا. 17 پيجي اُوئي منڪون ني شيڪائي ڪهيو ڪه، ”ڪي شاستر ۾ اِيئون ڪونهي لڪيوڙو ڪه، ’مهارو گهر شجعي قومون ري شارو پرائتا رو گهر هوشني‘

پن ٿون اِيئي ني ڌاڙيلون رو آڏو نائي چوڙيو هي.“

18 اِيئي تي ايشور را موٽا پوجاري هان ڌرمي گرو پريو يسوع ني مارڻ ري ڪوشش ڪرڻ لاڳا، پن او منڪون شون پيئاجتا ڪيونڪه منڪ اُوئي ري باتون تي حيرون هتا.

19 جڏي شام هوتي، تو پريو يسوع هان اُوئي را چيلا شهر شون باهر جاوتا.

شُوڪڙي انجیر ري بن شون سبق

(متي 22:20-21)

20 پيجي ڏن ساڪلي تاريخي جڏي او اوٽ شون لنگهيا، تو اُوئون انجیر ري بن ني شُوڪڙو ڏينو. 21 پطرس ني پريو يسوع ري ڪهيوڙي او بات ياد آئي، تو اُوئي ڪهيو ڪه، ”گرو جي، جوئوم، جڪي انجیر ري بن ني ٿون پتو هتوم، او شُوڪو رو.“ 22 پريو يسوع اُوئون ني بلتي ڏيني ڪه، ”تي ايشور تي وشواس راکو. 23 هون ٿوني شاجي ڪونه هون ڪه جي ڪڻ آڀري من ۾ شڪ ني ڪري هان پڪو وشواس راکشي، تو جي او اِيئي جبل ني ڪشي ڪه آڀري جگها شون اڪڙي جائي شُموندر ۾ ڪرم، تو آي هوئي جاشي. 24 اِيئي ري ڪري هون ٿوني ڪونه هون ڪه جڪو ڪئين تي پرائتا ۾ مونگشو هان وشواس راکشوم، تو او ٿوني ملي جاشي. 25 جڏي ٿي پرائتا ري شارو اُو هو هان جي ٿون شون ڪو ريشاجوڙو هي، تو اُوئي ني

معاف ڪرو، ايئي نموني تونرو آڪاشي پتا تونرا ڏوه معاف ڪرشي۔“<sup>26</sup> [جي ٿي اُوئي ني معاف ڪونهي ڪرو، تو تونرو آڪاشي پتا پي تونرا پاپ معاف ڪونهي ڪري۔]

### پريو يسوع ري اختيار ري بازي م سوال

(متي 27:21-23؛ لوقا 1:20-8)

<sup>27</sup> پچي جڏي او يروشلم شهر م آيا هان پريو يسوع ايشور ري گهر ري اوگتي م ڦرتو پڙيو، تو ايشور را موتا پوجاري، ڌرمي گرو هان يهودي اگروڻ اُوئي ڪيڏي آيا۔<sup>28</sup> او اُوئي شون پوچڻ لاگا ڪم، ”تو آي ڪوم ڪيري اختيار شون ڪري هي؟ ٿني آي اختيار ڪي ڏينو هي؟“<sup>29</sup> پريو يسوع اُوڻون ني ڪهيو ڪم، ”هُن پي ٿون شون هيڪ سوال پوچون هون۔ جي ٿون مهني ايئي ري بلتي ڏيني، تو پچي هون پي ٿوني شٽائين ڪه هون آي ڪوم ڪيري اختيار شون ڪرون هون۔“<sup>30</sup> مهني شٽائونم يوحنا ايشور ري طرفون پويتر سنون ڏيتو جون انسون ري طرفون؟“<sup>31</sup> ايئي تي او آيت م ڪيوڻ لاگا ڪم، ”جي آبي ڪونه ڪه ايشور ري طرفون، تو پچي او آيون ني ڪشي ڪه ٿون اُوئي تي وشواس ڪيون ڪونهي راکيو؟“<sup>32</sup> هان جي آيون ڪونه ڪه انسون ري طرفون، تو پچي آڀو ڪي هوشي۔“ او منڪون شون بيناجتام ڪيونڪه منڪ يوحنا ني نبي سمجهتا۔<sup>33</sup> ايئي ري ڪري اُوڻون پريو يسوع ني بلتي ڏيني ڪم، ”مهوني خبر ڪونهي۔“ تو پريو يسوع اُوڻون ني ڪهيو ڪم، ”تو هون پي ٿوني ڪونهي شٽائون ڪه هون آي ڪوم ڪيري اختيار شون ڪرون هون۔“

### انگورون ري باگ ري نيڪدارون رو مثال

(متي 46:33-21؛ لوقا 19:9-20)

**12**  
<sup>1</sup> پچي پريو يسوع اُوڻون ني مثالون ڏي ڪيوڻ لاگو ڪم، ”هيڪي زميندار انگورون رو باگ لگايو هان اُوئي ري چوڌاري لوڙهو ڌرايو هان رس ڪاڍڻ ري شارو هودي پي ٿڙائي هان پهرو ڏيوڻ ري شارو مورجو پي ٿڙايو۔ پچي باگ نيڪي تي ڏي آڀ ڪي پيچي ملڪ ٿونو گيو۔“<sup>2</sup> پچي جڏي انگورون ري مند آئي، تو اُوئي آڀري هيڪي غلوم ني باگيون ڪيڏي حصو ليون ري شارو مليو۔<sup>3</sup> پڻ باگيون اُوئي ني جهالي مار ڪاڍي هان ڪالي هات پاچو مليو۔<sup>4</sup> پچي مالڪ آڀرو پيچو غلوم مليو، پڻ اُوڻون اُوئي رو ماڻو ڦاڙيو هان بي عزتو ڪري پاچو مليو۔<sup>5</sup> پچي اُوئي هيڪ پيچو غلوم مليو، پڻ اُوڻون اُوئي ني ماري چوڙيو۔ ايئي نموني مالڪ آڀرا تموم گهڻا غلوم مليا، جڪون م اُوڻون ڪيني مار ڪاڍي هان ڪيني ماري چوڙيا۔<sup>6</sup> همي رگو اُوئي رو پيارو ڏيڪرو ريتو۔ نيٺ اُوئي آڀرو ڏيڪرو آي شوچي مليو ڪم، ’هوئي شگهي ڪه او مهاري ڏيڪري رو خيال ڪري۔‘<sup>7</sup> پڻ باگيون آڀت م صلاح ڪي ڪم، ’آي تو مالڪ رو ڏيڪرو هي۔ آڻو تو ايئي ني ماري چوڙون، تو پچي سجي ملڪيت آڀڻي هوئي جاشي۔‘<sup>8</sup> ايئي ري ڪري اُوڻون اُوئي ني جهالي ماري چوڙيو هان باگ شون باهر اُچلائي چوڙيو۔<sup>9</sup> همي باگ رو مالڪ اُوڻون شون ڪي ڪرشي؟ او آڀ آشي هان اُوڻون باگيون ني ماري چوڙشي هان آڀرو باگ پيچون ني ڏيشي۔<sup>10</sup> ڪي ٿون شاستر م ڪونهي پڙهيو ڪم

’جڪي پتر ني ڪاريگرون بيڪار سمجهو

اوج شجون شون خاص پتر هويو.

11 آي پرميشور ري طرفون هويو

هان آپني شارو ڪتري عجيب بات هي.“

12 ايني تي بهودي اگروڻ سمجها ڪه اوني آي مثال مهوني شنائي هي. پچي او ڪوشش ڪرڻ لاگا ڪه پريو يسوع ني جهالي، پڻ او منڪون شون بيٺاجتا، ايني ري ڪري او اوني ني چوڙي ٺوئا ڪيا.

### ٽيڪس ري باري ۾ سوال

(متي 22:15-22؛ لوقا 20:20-26)

13 پچي بهودي اگروڻون، فريسي هان هيروديس بادشاه ري تولي را ڪئينڪه منڪ پريو يسوع ڪيدي ميليا ڪه او اوني ني باتون ۾ قشاوي. 14 اوتون جائني پريو يسوع ني ڪهيو ڪه، ”گرو جي، مهوني خبر هي ڪه ٿي شاچا هو هان شچائي شون ايشور رو مارگ بتائو هو. ٿي ڪيرو پي پاشو ڪونهي ليتا هان نڪو ڪيري پرواه ڪرتا. 15 مهوني رومي مهاراجا قيصر ني ٽيڪس ڏيوڻ ڪپي جون نا؟“ پريو يسوع اوتون ري چالاڪي سمجهي ڪيو هان اوتون ني ڪهيو ڪه، ”تي مهني ڪيئون قاشاوڻ ري ڪوشش ڪرو هو؟ مهني چوندي رو هيڪ شڪو بتائو.“ 16 او چوندي رو شڪو اوني ڪيدي لي آيا. تو پريو يسوع اوتون شون پوچو ڪه، ”ايني تي ڪيرو قوتو هان نون هي؟“ اوتون ڪهيو ڪه، ”مهاراجا قيصر رو.“ 17 تو پريو يسوع اوتون ني ڪهيو ڪه، ”جڪو قيصر رو هي، او قيصر ني ڏيو هان جڪو ايشور رو هي، او ايشور ني ڏينو.“ جدي اوتون آي بات شئي، تو او حيرون هويا.

### قيامت ري ڏن ري باري ۾ سوال

(متي 23:23-33؛ لوقا 20:27-40)

18 پچي ڪئينڪه صلوقي منڪ، جڪون رو وشواس هتو ڪه مرڻ شون پچي ڪو پي پڙي جيتو ڪونهي هووي، او پريو يسوع ڪيدي آيا هان پوچو ڪه، 19 ”گرو جي، موسي مهوري شارو لڪيو هي ڪه، ’جي ڪن پريوچوڙو بنا اولاد مري جاوي، تو اوني ري پائي رو فرض هي ڪه آيري بايي شون بيان ڪري ڪه آيري پائي ري شارو اولاد هووي.“ 20 هيڪي خاندان ۾ شات پائي هتا. پيلڪو پائي پريوچوم او بنا اولاد مري ڪيو. 21 تو بيجو پائي آيري بايي شون پريوچوم پڻ او پي بنا اولاد مري ڪيو. ايني نموني تيجي پائي پي اينوج ڪيو. 22 ايري توڻي ڪه شات ني پائي بنا اولاد مري ڪيا. نيٺ او لگائي پي مري ڪئي. 23 همي مهوني شنائو ڪه پڙي جيتا هوڻ آي ڏن، او شاتون پايون ۾ ڪيري لگائي هوشي؟ ڪيونڪه اوتون شاتون هيڪي شون بيان ڪيو هتو.“ 24 پريو يسوع اوتون ني ڪهيو ڪه، ”تي ڪترا ني پونتريوڙا هو، ٿي نڪو تو شاستر ني سمجهتا هان نڪو ايشور ري طاقت ني. 25 ڪيونڪه جدي ايشور موٽرون ني جيتا ڪري شرگ ۾ لي جاشي، تو شرگ ۾ بيان بدوئا ڪونهي هووي، پڻ شرگ ۾ منڪ آڪاشي

فريشتون آلي كار هوشي. <sup>26</sup> ڪي ٽن مٿوڙون رو جيتا هونڙن ري باري ۾ آي ڪونهي پڙهيو جڪو موسي ري شاستر ۾ لڪيوڙو هي؟ جيٽ پرميشور

بلتي ٻوئي ري بات ۾ موسي ني ڪهيو هتو ڪم.

’هون ابراهيم، اضرحاق هان يعقوب رو ايشور هون-‘

<sup>27</sup> ايئي ري ڪري ايشور مٿوڙون رو نام پڻ جيتون رو ايشور هي، ڪيونڪه اوئي ري شارو سجائي جيتا هي. ٿي سجائي پتڪيوڙا هو-“

پرميشور رو سجون شون موتو حڪم

(متي 22:34-40؛ لوقا 10:25-28)

<sup>28</sup> اوت هيڪ ڌرمي گرو هتو جڪو اوئون ري باتون شنتو پڙيو ڪه پريو يسوع صدوقي منڪون ني بلتي ڏي مات ڪرايا هي، تو او اوئي ڪڍي آيو

هان پوچو ڪم، ”سجون شون موتو حڪم ڪيو هي؟“ <sup>29</sup> پريو يسوع اوئي ني بلتي ڏيئي ڪم، ”سجون شون موتو حڪم آي هي ڪم،

’اي اسرائيلي قوم ري منڪون، ذهيون ڏي شتم.

پرميشور آڻو هيڪج ايشور هي-.

<sup>30</sup> ٿو پرميشور آڻي ايشور شون

آڻي پوري دل، آڻي پوري جان

هان آڻي پوري سمجه هان آڻي پوري طاقت شون پريم ڪر-‘

<sup>31</sup> هان بيجو موتو حڪم آي هي ڪم،

’آڻي پاڙي آلي شون

آپ جترو پريم ڪر-‘

ايئي شون ٿال بيجو ڪو پي موتو حڪم ڪونهي-“

<sup>32</sup> ڌرمي گرو ڪهيو ڪم، ”گرو جي، ٿي شاجي ڪو هو- رگو هيڪج ايشور هي، اوئي شون ٿال بيجو ڪو پي ڪونهي <sup>33</sup> هان ايشور شون آڻي

پوري دل، آڻي پوري سمجه هان آڻي پوري طاقت شون پريم ڪرڻ هان آڻي پاڙي آلي شون آپ جترو پريم ڪرڻ، آي سجائي ٻالڻ آلا بليدون هان

چڙهاوا ڪرڻ شون وڌيڪ هي-“ <sup>34</sup> جڏي پريو يسوع ڏينو ڪه اوئي سمجه آلي بات ڪي هي، تو اوئي ني ڪهيو ڪم، ”ٿو ايشور ري بادشاهي

شون الگو ڪونهي هي-“ اوئي شون پڇي ڪيني پي همت ڪونهي هوئي ڪه او پريو يسوع شون ڪو سوال پوڇي-.

واعدي ڪيٿوڙي مسيح ري باري ۾ سوال

(متي 46-41:22؛ لوقا 44-41:20)

<sup>35</sup> ڀڄي جڏي پريو يسوع ايشور ري گهر ۾ منڪون ني شيڪاوتو پڙيو، تو اوني اونون شون پوڄو ڪم، ”ڌرمي گرو ڪيئون ڪي هي ڪم مسيح، دائود

بادشاه رو اولاد هي؟ <sup>36</sup> دائود بادشاه آپ پويتر آتما ري ڪيئون تي اوني ني پريو ڪي هي ڪم،

’پرميشور مهاري پريو ني ڪهيو

ڪم مهاري شاجي پاشي پيش-

جتري توڻي هون تارا دشمن هرائي

تازي پگون هينا ني ڪرون-‘

<sup>37</sup> جي دائود آپ مسيح ني پريو ڪي هي، تو ڀڄي او دائود رو ڏيڪرو ڪيڪر هويو؟“

شجائي منڪ پريو يسوع ري باتون تموم گهڻي خوشي شون سڻتا-

نگ ڌرمي منڪون شون هوشيار ڪرڻ

(متي 36-1:23؛ لوقا 47-45:20)

<sup>38</sup> ڀڄي پريو يسوع منڪون ني شيڪاوتي ڪهيو ڪم، ”تي ڌرمي گروئون شون هوشيار رهيا جڪو موتا موتا جبا پيري اينا اونا ڦرڻ پسند ڪري هي ڪم

شهر ۾ منڪ اونون ني عزت شون نمسڪار ڪري- <sup>39</sup> اونون ري مرضي هووي هي ڪم او پگتي گهرون هان موتي دعوتون ۾ شجون شون خاص

جگها تي پيشي- <sup>40</sup> او رونڊپير لگايون ري گهرون تي قبضا ڪري هي هان آپني نيڪ بتاوڻ ري شارو لونبي لونبي پراتنائون ڪري هي- اهڙي منڪون

ني تموم گهڻي سزا ملشي-“

رونڊپير لگائي رو دون ڏيوڻ

(لوقا 4-1:21)

<sup>41</sup> ڀڄي پريو يسوع ايشور ري گهر ۾ دون ري بيتي ري شومهو بيشي جوڻ لاگو ڪم منڪ ڪيڪر دون ڏي هي- تموم گهڻا امير منڪ دون ۾

گهڻو ڪئين ڏينا پڙيا- <sup>42</sup> اوڻ هيڪ غريب رونڊپير لگائي آئي جڪي بي سڪا ڏينا- <sup>43</sup> آي جوڻي پريو يسوع آپري چيلون ني آپ ڪيڊي هيلو ڪري

ڪهيو ڪم، ”هون توڻي ڪونه هون ڪم ايئي رونڊپير شجون شون وڌيڪ دون ڏينو هي، <sup>44</sup> ڪيونڪ اونون شجون آپري گهڻي ملڪيت ري ڪري

دون ڏينوم پڻ ايئي رونڊپير آپري غريبي حال ۾ جڪو ڪئين اوني ڪيڊي هتوم او شجوڻي دون ۾ ڏينو هي-“

## پريو يسوع ري اگڪتي

(متي 24:1-2؛ لوقا 21:5-6)

1 جڏي پريو يسوع ايشور ري گهر شون باهر جاتو پٿرو، تو اوني ري چيلون ۾ هيڪي ڪهيو ڪه، ”گرو جي، جوئو اي پٿر ڪترا تو موتا موتا هي هان اي جگهائون ڪتري ني قوتري هي.“ 2 تو پريو يسوع اوني ني بلتي ڏيني ڪه، ”تي جڪو موتي موتي جگهائون ايت ڏيڪو هوم، ائون رو هيڪ پي پٿر شاجو ڪونهي بجي هان شجو ڪنين بڪوريو جاشي.“

# 13

## ڏک مصيبتون ري باري ۾ اگڪتي

(متي 24:3-14؛ لوقا 21:7-19)

3 پچي جڏي پريو يسوع زئون ري جبل تي ايشور ري گهر ري شومهو ٻينو هتو، تو پطرس، يعقوب، يوحنا هان اندرياس هيڪلائي ۾ اوني شون پوچو ڪه، 4 ”مهوني شنائو ڪه اي باتون ڪڏي هوشي هان ڪهڙا ڪهڙا نشون هوشي جڪي شون خبر پڙشي ڪه اي شجي باتون پوري هونڻ آئي هي؟“ 5 پريو يسوع ائون ني بلتي ڏيني ڪه، ”هوشيار رهيا، متان ڪو ٿوني دوکو ڏي.“ 6 تموم گهڻا منڪ مهاري نون شون آشي هان ڪشي ڪه هون مسيح هون هان او تموم گهڻي منڪون ني ڀلائي چوڙشي. 7 جڏي تي جنگ هان جهيڙون ري باتون شتو، تو گهرايا ني، ڪيونڪه ايئون ضرور هوشي، پڻ اي جگت چيڪو ختم ڪونهي هوڙي. 8 قوم، قوم شون هان بادشاهي، بادشاهي شون پڙشي. هر جگهه زلزلا آشي هان ڏڪال پڙشي. اي رگو ڏڪون ري شروعات هوشي. 9 پڻ هوشيار رهيا، منڪ ٿوني جهالي ڪورتن ۾ لي جاشي هان پگتي گهرون ۾ مارا ڪوتو ڪشي. ٿوني مهاري چيلا هونڻ ري ڪري بادشاهون هان اگوڻون ڪڍي لي جاشي، پڻ او موقعو هوشي جڪي ۾ تي مهاري گواهي ڏيشو. 10 جتري ٿوني مهاري باري ۾ خوشي ري خبر شجي قومون ٿوني ڪونهي پڳي، اتر ٿوني جگت ختم ڪونهي هوڙي. 11 پڻ جڏي او ٿوني جهالي ڪورتن ۾ لي جاوي، تو تي گهڻي ني ڪريا ڪه ٿوني ڪي ڪيوڻو هي، ڪيونڪه جڪو پي ٿوني ڪيوڻو هوشي اويج نيم ٿوني شتايو جاشي. تي آب ڪونهي بولوم، پڻ پويتر اتما ٿوني شتاشي ڪه ٿوني ڪي ڪيوڻو هي. 12 پائي، پائي ني هان ٻاپ ڏيڪري ني مراون ري شارو جهلاشي. ڏيڪرا آڀري ما ٻاپ ري خلاف هوئي ائون ني مرائي چوڙشي. 13 مهاري نون ري ڪري شجائي منڪ ٿون شون نفرت ڪشي، پڻ جڪو آخر ٿوني مهاري باتون تي بيشي، تو اوني ني مگتي ملشي.

## پليت شئي ري باري ۾ اگڪتي

(متي 24:15-28؛ لوقا 21:20-24)

14 جڏي تي اوني برباد ڪرڻ آئي پليت شئي ني پويتر جگهه ۾ ايوڙو ڏيڪوم، تو تي شمجهي جايا. اوني نيم جڪو يهوديا صوبي ۾ هوڙي، تو او جبلون ڏينما ناشي جاوي. 15 جڪو آڀري گهر ري چت تي هوڙي، تو او آڀرو سيمون ليون ري شارو هينا ني اتر ٿوني هان ني گهر ۾ جاوي. 16 جڪو ٻني تي

هووي، او آيرا گاڀا ليون ري شارو پاچو گهري ني جاوي. 17 ذڪ هي اونون لڳايون تي، جڪو اونون ڏنون ۾ اميد شون هوشي جون آيري ٻالون ني ڏوڏ پياڙتي هوشي. 18 پراڻا ڪرو ڪه توني شيائي ۾ ناشو ني پڙي. 19 ڪيونڪه اونئي ڏن اهڙي موتي مصيبت آشي ڪه جڏي شون ايشور جگت ناهيو هي، اونئي ڏن شون لي آج توڙي نڪو اهڙي مصيبت آي هي هان نڪو ڪڏي آوي. 20 جي پرميشور اونئي مصيبت ري ڏنون رو مڏو ني گهٽائونت، تو ڪو پي بجي ڪونهي شگهونت، پڻ اونئي آيري چونڊيوڙي منڪون ري ڪري اونون ڏنون رو مڏو گهٽايو هي. 21 اونئي تيم جي ڪڻ توني ڪي ڪم، جوئوم مسيح ايت هي جون اوڻ هي. تو تي اونون ري باتون تي پروسو ني ڪريا. 22 ڪيونڪه اهڙا ڪوڙا منڪ آشي جڪو آيني مسيح جون نبي ڪشي. او نشون هان اهڙا عجيب ڪوم بتاشي جڪي شون منڪ حبرون هوئي جاشي. اونون رو مقصد هوشي ڪه او ايشور ري منڪون ني پونترائي چوڙي. 23 پڻ تي شجاگ رو. جوئوم مهڙي شجي باتون هوڻ شون پيل توني آگ ۾ شجو ڪين شٽايو رو.

### منش پتر پريو يسوع رو پڙي اوڻ

(متي 24:29-31؛ لوقا 21:25-28)

24 اونون مصيبتون شون پچي شورج هان چنڊر آيرو اڃائو ڪونهي ڏي، 25 تارا آڪاش شون ڪرشي هان آڪاش ري شجي شيون هلائي جاشي. 26 اونئي تيم منڪ مهڙي منش پتر ني طاقت هان موتي مهما شون باڏئون پيڙو آوتو ڏيڪشي. 27 پچي هون آيري فريشتون ني ميلين هان او ايشور ري چونڊيوڙي منڪون ني آڪاش هان ڌرتي ري چارئي پاشي پڙا ڪرشي.

### انجبر ري بن رو مثال

(متي 24:32-35؛ لوقا 21:29-33)

28 پچي پريو يسوع ڪهيو ڪم، ”انجبر ري بن شون شيڪو. جڏي اونئي ري ٿائي نرم هووي هي هان اونئي ۾ پون لاڳي هي، تو تي ڏيڪي سمجهو هو ڪه همي اونالو اوڻ آو هي. 29 ايني آلي ڪار جڏي تي اي شجي باتون هوئي ڏيڪو، تو سمجها ڪه ايشور ري بادشاهي چيڪي اوڻ آي هي. 30 هون توني شاجي ڪونه هون ڪه جتري توڙي اي باتون پوري ڪونهي هووي، اتر تي توڙي اي نسل ڪونهي متي. 31 آڪاش هان ڌرتي تو متي جاشي پڻ مهاري باتون ڪڏي پي ڪونهي متي.“

### شجاگ رهيا

(متي 24:36-44)

32 پچي پريو يسوع ڪهيو ڪم، ”ڪيني پي خبر ڪونهي ڪه او ڏن هان تيم ڪڏي آشي، نڪو آڪاشي فريشتون ني هان نڪو ڏيڪري ني، پڻ رگو پتا ني خبر هي. 33 خبردارم، جاگتا رو ڪيونڪه توني خبر ڪونهي ڪه او ڏن ڪڏي آشي. 34 مهاري پاچي اوڻ ري بات ايشور هي ڪه هيڪ منڪ هتو جڪي پرديس ۾ جاوڻ شون پيل آيري غلومون ني اٿايا هان اونون ني آيري آيري ايتاري ڏيني. اونئي هر هيڪ ني آيرو آيرو ڪوم شٽايو هان

چوڪيدار ني حُڪم ڏينو ڪه سُجاگ رئي. <sup>35</sup> ائيني ري ڪري ٿي سُجاگ روم ڪيونڪه ٿوني خبر ڪونهي ڪه گهر رو مالڪ ڪڏي آشي، هوني شگهي هي ڪه شام روم آڏي رات روم جون ڪوڪڙي بونگ ڏيتي ٻلام جون ڏن اگني ٻلا. <sup>36</sup> ائينون ني هووي ڪه او اوچتو آوي هان ٿوني سُوتوڙا ڏيڪي. <sup>37</sup> هون ٿوني جڪو ڪئين ڪونه پڙيوم او بيچون ري شارو پي هي ڪه ٿي شجائي سُجاگ رهيا.

### پريو يسوع ري خلاف رٿا

(متي 5:1-26؛ لوقا 2:1-22؛ يوحنا 11:45-53)

**14** <sup>1</sup> ٻيون ڏنون شون پيحي فسح يعني بنا ڪمير ٻاتي رو پرَب آوڻ آتو هتو. ايشور را موتا پوجاري هان ڌرمي گرو تال ۾ هتا ڪه ڪيڪر پريو يسوع ني دوکو ڏي جهلاوي هان ماري چوڙي. <sup>2</sup> پڻ او آي ڪيتا ڪه، ”آبي اوئي ني پرَب تي ڪونهي جهالون، ائينون ني هووي ڪه منڪ هنگومو ڪري.“

### هيڪي لگائي رو پريو يسوع ني عطر لگاڻ

(متي 26:6-13؛ يوحنا 12:1-8)

<sup>3</sup> پريو يسوع بيت عنيا گون ۾ شمعون ڪوڙهي ري گهري ٻاتي ڪاوڻ بينوم تو هيڪ لگائي سنگ مرمر ري شيمي ۾ مهونگو هان نج عطر لي آئي هان شيمي پونگي عطر پريو يسوع ري مائي تي لگايو. <sup>4</sup> آي جوئي ڪئينڪه منڪون ني ريش آئي هان ڪيوڻ لاگا ڪه، ”آي عطر ڪيئون زيئون ڪيو هي؟ <sup>5</sup> جي آي عطر بيچون تو، تو ائيني را تين سئو شون وڌيڪ چوندي را شڪا ملون تو، هان مهني او غريبن ۾ ٻلائون تو.“ ائيني ري ڪري او اوئي لگائي ني ڌڙڪا ڏيون لاگا. <sup>6</sup> پريو يسوع ڪهيو ڪه، ”اينهي لگائي ني ڪئين ني ڪوم ڪيونڪه ائيني مهاري شارو ڪترو ني سئو ڪوم ڪيو هي. <sup>7</sup> ڪيونڪه غريب تو هميشا ٿون ڪيدي ريشي هان جڏي ٿونرو من ڪي اوئون ري مدد ڪري شگهو هم، پڻ هون هميشا ٿون پيڙو ڪونهي رون. <sup>8</sup> ائيني لگائي شون جترو پي هويو اوئي ڪيو. حقيقت ۾ ائيني مهني ٻوڙ ري تياري ري شارو مهاري شير تي عطر لگايو هي. <sup>9</sup> هون ٿوني شاجي ڪونه هون ڪه سجي دنيا ۾ جيت پي خوشي ري خبر رو پرچار ڪيو جاشي، تو اوڻ ائيني لگائي ري يادگيري ۾ ائيني ري نيڪي ري بات سٿائي جاشي جڪو ائيني ڪي هي.“

### يهودا اسڪريوتي رو پريو يسوع ني دوکو ڏيون

(متي 26:14-16؛ لوقا 22:3-6)

<sup>10</sup> پيحي يهودا اسڪريوتي جڪو پريو يسوع ري ٻارهون چيلون ۾ هيڪ هتو، او ايشور ري موتي پوجاريون ڪيدي گيو ڪه پريو يسوع ني اوئون ري حوالي ڪري. <sup>11</sup> او يهودا ري بات سٿي خوش هويا هان اوئي ني پشا ڏيون رو واعدو ڪيو. پيحي يهودا تال ڪرتو رهيو ڪه ڪيڪر پريو يسوع ني جهلائي اوئون ري حوالي ڪري.

## فَسْح پَرَب رِي ٻاٽِي رِي تِياري

(متي 25-17:26؛ لوقا 23-7:22؛ يوحنا 30-21:13)

12 جڏي فَسْح يعني بنا ڪمير ٻاٽي رو پَرَب آيو، تو اُونون ڏنن ۾ يهودي منڪ گهٽي رو ٻليدون ڪرنا. پڇي چيلون پريو يسوع شون پوڄو ڪم، ”تاري ڪهڙي مرضي هي ڪم مهيا تاري شارو فَسْح پَرَب رِي ٻاٽي رِي تِياري ڪيٽ ڪرون؟“ 13 پريو يسوع آڀري چيلون ۾ پيئون چيلون ني اي ڪي ميليا ڪم، ”تي شهر ۾ جائو. اوت توني هيڪ منڪ پيڙو هوشي جڪو پوڻي رو ڊلو ڪئي جاوتو هوشي. تي اوني لاري جايا 14 هان جڪي گهر ۾ او جاوي، تي اوني گهر ري مالڪ ني ڪهيا ڪم، ”گرو جي تي شون پوڄو هي ڪم، ”مهرو ڪمرو ڪيٽ هي، جيٽ هون آڀري چيلون پيڙو فَسْح پَرَب رِي ٻاٽي ڪائين؟“ 15 تو او آپ توني چت تي هيڪ تيار ڪيڙو موتو ڪمرو بناشي، تي اوتج آڀي شارو فَسْح رِي پَرَب رِي ٻاٽي رِي تِياري ڪريا.“ 16 پڇي او پيئي چيلا شهر ڏيشا گيا هان جون پريو يسوع اُونون ني ڪهيو هتو، اينوج اُونون ڏينو هان اوت اُونون فَسْح پَرَب رِي ٻاٽي رِي تِياري ڪي. 17 جڏي شام هوي، تو پريو يسوع ٻارهون چيلون پيڙو اوت آيو. 18 جڏي او پيشي ٻاٽي کاوتا پڙيا، تو پريو يسوع ڪهيو ڪم، ”هون توني شاجي ڪونه هون ڪم تون ۾ هيڪ جتو جڪو مهيا پيڙو ٻاٽي کاوي پڙيو، او مهني جهلاشي.“ 19 ايئي تي اُونون ني تموم گهڻو ڏک هويو هان او هيڪي پيڇي لاري پوڄڻ لاگا ڪم، ”مالڪ ڪي او هون تو ڪونهي؟“ 20 پريو يسوع اُونون ني ڪهيو ڪم، ”او منڪ تون ٻارهون ۾ هيڪ هي جڪو مهيا پيڙو ٿالي ۾ ٻاٽي کاوي پڙيو، 21 ڪيونڪه جون مهيا منس پتر ري باري ۾ شاستر ۾ لڪيڙو هي ڪم هون ضرور مرين، پڻ ڏک هي اوني تي جڪو مهني جهلاشي. اوني منڪ ري شارو پلو هتو ڪم او ني جايو هوونت، تو پلو هتو.“

## فَسْح پَرَب رِي آخري ٻاٽي کاوڻ

(متي 30-26:26؛ لوقا 20-14:22؛ 1-ڪرنٿيون 25-23:11)

22 ٻاٽي کاوتي بلا پريو يسوع ٻاٽي لي هان ايشور رو شڪر ڪري پونگي هان چيلون ني ڏي ڪهيو ڪم، ”ليئو، اي مهرو شري هي.“ 23 پڇي اوني انگورون ري رس رو پيالو لي ايشور رو شڪر ڪيو هان اُونون ني ڏينو. پڇي اُونون شجون اوني ۾ پيئو. 24 پڇي پريو يسوع ڪهيو ڪم، ”اي پيالو مهاري لوي رو نئون وچن هي جڪو هون تموم گهڻي منڪون ري ٻيون ري معافي ري شارو بهائين. 25 هون توني شاجي ڪونه هون ڪم انگورون رو رس پڙي ڪڏي پي ڪونهي پيئون، جتري توتي هون ايشور ري بادشاهي ۾ نونو انگورون رو رس ني پيئون.“ 26 پڇي پجن گائي پريو يسوع هان اوني را چيلا زيتون ري جبل تي گيا.

## پطرس ري انڪار ري باري ۾ اگهڻي

(متي 35-31:26؛ لوقا 34-31:22؛ يوحنا 38-36:13)

27 پڇي پريو يسوع آڀري چيلون ني ڪهيو ڪم، ”تي شجائي مهني چوڙي ناشي جاشو ڪيونڪه شاستر ۾ لڪيڙو هي ڪم،

‘هُونَ دَرَاژَ نِي مَارِينِ

هَانَ رِيُونِ تَرِ پَكْرَ هُونِي جَاشِي-‘

<sup>28</sup> پڻ هُون جيتو هُونِي اُنڻ شون پڇي تون شون پيل گليل صُوبِي ڏيما جائين-“ <sup>29</sup> اِيئي تي بطرس پريو يسوع نِي ڪهيو ڪم، ”پلي بيجا شجائي تني چوڙي ناشي جاوي، پڻ هُون تني ڪونهي چوڙون-“ <sup>30</sup> پريو يسوع بطرس نِي ڪهيو ڪم، ”هُون تني شاچي ڪونه هون ڪه آج رات ڪوڪڙي رو بي گهمرا هونگ ڏيون شون پيل تُو تين گهمرا ڪئي ڪم، ”هُون اِيئي نِي ڪونهي اولکتو-“ <sup>31</sup> پڻ بطرس تموم گهڻي جوش شون ڪهيو ڪم، ”جي مهني تني پيڙو مرڻو پي پڙي، تو پي هُون ڪڏي پي ڪونهي ڪونه ڪم، ”هُون تني ڪونهي اولکتو-“ باقي شجون چيلون پي ايتون رو ايتون ڪهيو-

### پريو يسوع رو گنسمني باگ ۾ پرائنا ڪرڻ

(متي 46:26-36؛ لوقا 22:39-46)

<sup>32</sup> پڇي او گنسمني نون ري باگ ۾ ڪيا- پريو يسوع چيلون نِي ڪهيو ڪم، ”تي ايت پيشوم، تو هُون جائي پرائنا ڪرون هون-“ <sup>33</sup> پڇي او بطرس، يعقوب هان يوحنا نِي آب پيڙا لي گيو هان او تموم گهڻو پريشون هان اداس هوڻ لاگو- <sup>34</sup> اِيئي تي پريو يسوع اوتون نِي ڪهيو ڪم، ”مهاري من ۾ اترو تو گهڻو ڏک هي، جهڙو هُون مرڻ آڻو هون- تي ايت پينا رو هان جاگتا رو-“ <sup>35</sup> اوتني شون پڇي او توڙو الگو گيو هان زمين تي ڪري پرائنا ڪرڻ لاگو ڪم، ”جي هونِي شگهي، تو مهني ايتي ڏک هان تڪليف شون بجا-“ <sup>36</sup> پڇي اوتني ڪهيو ڪم، ”اي ابا، تُو تو شجو ڪئين ڪري شگهي هي- ايتي ري ڪري تُو ڏڪون رو اي پيالو مهني شون تالتي چوڙ، پڻ تو پي مهاري نام، پڻ تاري مرضي پوري هوئي-“

<sup>37</sup> جڏي او پاچو آيو هان اوتون نِي شوتوڙا ڏينام، تو اوتني بطرس نِي ڪهيو ڪم، ”شمعون، تُو اونگاجوڙو هي؟ ڪي تُو هيڪ ڪلاڪ پي مهني پيڙو جاگي ڪونهي شگهو؟ <sup>38</sup> جاگتا هان پرائنا ڪرنا رو ڪه شيطون تونرو آزموتو ني لي- تونرو دل تو ايتون ڪي هي، پڻ تونرو شير ڪمزور هي-“

<sup>39</sup> پڇي پريو يسوع شاگي نموني جائي پرائنا ڪرڻ لاگو- <sup>40</sup> هيڪ گهمرو پڙي او چيلون ڪيڏي آيو هان اوتون نِي اونگ ري ڪري اونگاجوڙا ڏينام، ڪيونڪه اوتون نِي خبر پي ڪونهي هتي ڪه ڪهڙي بلتي ڏيوڙي هي- <sup>41</sup> پڇي جڏي پريو يسوع تيجو گهمرو چيلون ڪيڏي آيو، تو اوتون نِي ڪهيو ڪم، ”همي پلي شوتا هان اونگاجتا رو- شتوم او تيم آيو رو ڪه هُون منش پتر پايي منڪون ري حوالي ڪيو جائين- <sup>42</sup> اُنم آبي هالون ڪيونڪه جونم مهني جهلاوڻ آڻو نيڙو آيو رو-“

### پريو يسوع نِي جهانن

(متي 56:26-47؛ لوقا 22:47-53؛ يوحنا 18:3-12)

<sup>43</sup> ايجون پريو يسوع بولتو ئي پڙيوم، تو اوتنيج تيم يهودا جڪو ٻارھون چيلون ۾ هتو آيو- اوتني پيڙا بيجا تموم گهڻا منڪ پي هتا جڪون ڪيڏي تلوارون هان گيڏي هتي- اوتون نِي ايشور ري موتي پوجاريون، درمي گروئون هان يهودي اگووڻون ميليا هتا- <sup>44</sup> اوتني دوکو ڏيوڙا آڻي يهودا اوتون نِي آي نشوني

ڏيئي هتي ڪم، ”هُن جڪي منڪ نِي مينڪي ڏيئون اوج پريو يسوع هوشي، تي اُوئي نِي ڪاڻو جهالي لي جايا.“<sup>45</sup> پڇي يهودا پريو يسوع ڪڍي آيو هان ڪهيو ڪم، ”گرو جي.“ هان اُوئي نِي مينڪي ڏيئي.<sup>46</sup> اِئي تي منڪون پريو يسوع نِي جهالي ڪاڻو ڪيئو.<sup>47</sup> پڇي پريو يسوع ري ساٿيون ۾ هيڪي آڀري تلوار ڪاڍي، ايشور ري پوجاريون ري سردار ري غلوم رو ڪون باڍي چوڙيو.<sup>48</sup> پڇي پريو يسوع توڙي نِي ڪهيو ڪم، ”ڪي تي مهني ڌاڙيل سمجهو هو جڪو تلوارون هان گيڏي لي مهني جهالڻ آيا هو؟<sup>49</sup> جڏي هون هروز تون ڪڍي ايشور ري گهر ۾ شيڪاوتوم تو اُوئي تيم تون مهني ڪيئون ڪونهي جهاليو؟ پڻ آي اِئي ري ڪري هيو ڪه شاستر ري باتون پوري هوي.“<sup>50</sup> پڇي شجائي چيلا پريو يسوع نِي چوڙي ناشي ڪيا.

<sup>51</sup> اوت هيڪ نوجوان هتو جڪي ري رگو پوتڙي ٻاڏوڙي هتي. او پريو يسوع لاري جاوتو پڙيو، تو منڪون اُوئي نِي جهالڻ ري ڪوشش ڪي،<sup>52</sup> تو او پوتڙي اوتج چوڙي اگهاڙو ناشي ڪيو.

### پريو يسوع يهودي ڌرمي پنچائيت آگهي

(متي 26:57-68؛ لوقا 22:54-55، 63-71؛ يوحنا 13:18-19، 24)

<sup>53</sup> پڇي او پريو يسوع نِي جهالي ايشور ري پوجاريون ري سردار ڪڍي لي ڪيا جيٽ ايشور را موتا پوجاري، يهودي اگوڻ هان ڌرمي گرو پيڙا هوبا.  
<sup>54</sup> پطرس ڪئينڪ الگو الگو پريو يسوع لاري ايشور ري پوجاريون ري سردار ري گهر ري اوگڙي توڙي گيو هان جائِي نوڪرون پيڙو پيشي باشڏي تي تپڻ لاگو.<sup>55</sup> ايشور را موتا پوجاري هان شجائي ڌرمي پنچائيت آلا تموم گهڻي ڪوشش ڪرڻ لاگا ڪه پريو يسوع ري خلاف ڪوڙا گواه لي آوي ڪه اُوئي نِي موت ري سزا ڏيئي جاوي، پڻ اُونون نِي ڪو پي اهڙي بات ڪونهي لاڏي.<sup>56</sup> تموم گهڻي منڪون اُوئي ري خلاف ڪوڙي گواهي ڏيئي، پڻ اُونون ري گواهي هيڪ جهڙي ڪونهي هتي.<sup>57</sup> نيٺ ڪئينڪ منڪون اُئي آي ڪوڙي گواهي ڏيئي ڪم،<sup>58</sup> ”مهون اِئي نِي آي ڪيئي شُٽيو هي ڪم، هون منڪون ري ناهيوڙي اِئي ايشور ري گهر نِي بڪوري تينون ڏنن ۾ پيچو نائين جڪو منڪون رو ناهيوڙو ڪونهي هوي.“  
<sup>59</sup> پڻ اُونون ري ڏينوڙي گواهي هيڪ جهڙي ڪونهي هتي.<sup>60</sup> پڇي ايشور ري پوجاريون رو سردار اُنيو هان پريو يسوع شون پوچو ڪم، ”تو اِئي الزوم ري ٻاري ۾ ڪي ڪي هي؟“<sup>61</sup> پڻ پريو يسوع مات هتو هان ڪو پي بلتي ڪونهي ڏيئي. پڇي ايشور ري پوجاريون ري سردار پڙي پوچو ڪم، ”ڪي تو ايشور رو ڏيڪرو مسيح هي؟“<sup>62</sup> تو پريو يسوع اُوئي نِي بلتي ڏيئي ڪم، ”هاوي، هون هون هان تي مهني مُنش پُتر نِي ايشور ري شاجي پاشي عزت هان اِختياري شون پينوڙو هان ٻاڏئون پيڙو اوتو ڏيڪشو.“<sup>63</sup> اِئي تي ايشور ري پوجاريون ري سردار آڀرا گايا ڦاڙيا هان ڪهيو ڪم، ”همي مهوني ڪي گواهون ري ڪهڙي ضرورت،<sup>64</sup> تون هتون ايشور ري خلاف اِئي ري آي بات شُٽي هي، تو همي تونري ڪهڙي صلاح هي؟“ اِئي تي شجائي منڪون فيصلو ڪيئو ڪم، ”آي ڏوهي هي هان اِئي نِي موت ري سزا ڏيئو.“<sup>65</sup> پڇي ڪئينڪ منڪون پريو يسوع ري موڏي تي تُوڪيو هان اُوئي ري اونڪي بونڏي اُوئي نِي نونشا هڻي ڪيوڻ لاگا ڪم، ”سُٺام تئي ڪي ڌڪ هڻيو؟“ پڇي فوجي گهڙي گهڙي اُوئي نِي تپڙون هڻتا رهيا.

## پطرس رو پريو يسوع رو انكار

(متي 26:69-75؛ لوقا 22:56-62؛ يوحنا 18:15-18، 25:27)

66 پطرس آجون توڻي باهر اوگڻي ۾ بينو هتو. اوت ايشور ري پوجاريون ري شردار ري هيڪ بونهي آئي. 67 اوڻي پطرس ني باشدي تي تبتو ڏينوم، تو  
 كهيو ڪم، ”تو پي يسوع ناصرِي پيڙو هتو.“ 68 پڻ اوڻي انكار ڪري كهيو ڪم، ”مهني شمعجھ ڪونهي آوتي ڪه تو ڪي ڪي هي؟“ پچي  
 پطرس باهر در ڏيشا گيو هان اوڻيچ تيم ڪوڪڙي بونگ ڏيئي. 69 او بونهي پڙي اوڻي ني ڏيڪي آپ ڪڍي اڀوڙي منڪون ني ڪيوڻ لاگي ڪم، ”آي  
 اوڻون مئيلو هي.“ 70 پڻ پطرس پڙي انكار ڪيو. توڙي دير شون پچي اوت اڀوڙي منڪون پطرس ني كهيو ڪم، ”بيشڪ تو پي اوڻون مئيلو هي،  
 ڪيونڪه تو پي گليل صوبي رو هي.“ 71 پڻ پطرس شونش لي ڪيوڻ لاگو ڪم، ”ڪوڙي تي لعنت، تي جڪي ري باري ۾ ڪو هو، هون تو ايئي  
 ني اولڪنو ئي ڪونهي.“ 72 ايئي تي ڪوڪڙي اوڻيچ تيم بيجو گهمرو بونگ ڏيئي هان پطرس ني پريو يسوع را او بول ياد آيا ڪم، ”ڪوڪڙي رو بي  
 گهمرا بونگ ڏيوڻ شون پيل تو تين گهمرا ڪئي ڪم، هون ايئي ني ڪونهي اولڪنو.“ ايئي تي اوڻي ني تموم گهڻو ڏک هيو هان او روڻ لاگو.

## پريو يسوع گورنر پلاطس ري حوالي

(متي 27:1-2، 11-14؛ لوقا 23:1-5؛ يوحنا 18:28-38)

1 جڏي ڏن اگوم، تو ايشور ري موڻي پوجاريون، يهودي اگورون، ڌرمي گروڻون هان ڌرمي پنچائيت آتون شون صلاح ڪري پريو يسوع  
 ري خلاف فيصلو ڪيو. پچي اوڻون پريو يسوع ني بونڌائي رومي گورنر پلاطس ري حوالي ڪيو. 2 پلاطس اوڻي شون پوڄو ڪم،  
 ”ڪي تو يهوديون رو بادشاه هي؟“ پريو يسوع كهيو ڪم، ”تو آپ ڪي هي.“ 3 پڻ ايشور را موڻا پوجاري اوڻي تي تموم گهڻا ڏوه هتتا رهيا.  
 4 پچي پلاطس اوڻي شون پڙي پوڄو ڪم، ”تو ڪيئون ڪونهي بلتي ڏيتو؟ جو، آي منڪ تي تي ڪهڙا ڪهڙا ڏوه ڏي پڙيا؟“ 5 پڻ پريو يسوع ڪو  
 پي بلتي ڪونهي ڏيئي. ايئي بات تي پلاطس تموم گهڻو حيرون هيو.

## پريو يسوع ني موت ري سزا ڏيوڻ

(متي 27:15-26؛ لوقا 23:13-25؛ يوحنا 18:39-19:16)

6 هر شال فسح ري پرَب تي پلاطس منڪون ري شارو هيڪي قيدي ني ڦٽو ڪرتو، جڪي ري منڪ منت ڪرتا. 7 اوڻون ڏنون ۾ هيڪ قيدي هتو  
 جڪي رو نون برابا هتو. او اوڻون قشري ڪرڻ آتون مئيلو هتو جڪي ني شهر ۾ جهيڙا ڪرڻ هان خون ڪرڻ ري ڪري جيل ۾ گهاتيو هتو.  
 8 سڃائي منڪ پيڙا هوڻي پلاطس ني منت ڪرڻ لاگا ڪه او هر شال آئي ڪار اوڻون ري شارو هيڪي قيدي ني چوڙي. 9 تو پلاطس اوڻون شون  
 پوڄو ڪم، ”تو پچي ڪي تونري مرضي هي ڪه هون تونري شارو يهوديون ري بادشاه ني ڦٽو ڪرون؟“ 10 اوڻي آي ايئي ري ڪري كهيو ڪيونڪه  
 اوڻي ني خبر هتي ڪه ايشور ري موڻي پوجاريون پريو يسوع ني شال ۾ جهلايو هي. 11 پڻ ايشور ري موڻي پوجاريون منڪون ني شيڪايو ڪم پلاطس

اُونون ري شارو پريو يسوع ري جگها برابا ني چوڙي. <sup>12</sup> ايئي تي پلاطس پڙي اُونون شون پوچو ڪم، ”تو پڇي هون ايئي منڪ شون ڪي ڪرون جڪي ني تي يهوديون رو بادشاه ڪو هو؟“ <sup>13</sup> تو شجائي منڪ زور شون ڪيوڻ لاگا ڪم، ”ايئي ني شولي تي چاڙهي ماري چوڙو.“ <sup>14</sup> پلاطس ڪهيو ڪم، ”ڪيئون، ايئي ڪهڙو ڏوه ڪيو هي؟“ پڻ او آجون پي وڌيڪ زور شون رڙي ڪري ڪيوڻ لاگا ڪم، ”ايئي ني شولي تي چاڙهو.“ <sup>15</sup> ايئي تي پلاطس منڪون ني خوش ڪرڻ ري شارو برابا ني ڦٽو ڪيو هان پريو يسوع ني چاڻڪ هڻائي فوجيون ري حوالي ڪيو ڪ او اُوئي ني شولي تي چاڙهي ماري چوڙي.

### فوجيون رو پريو يسوع تي نٺولي ڪرڻ

(متي 27:27-31؛ يوحنا 19:2-3)

<sup>16</sup> پڇي فوجي پريو يسوع ني پلاطس ري ڪوت ري اوگڻي ۾ لي گيا هان بڇي فوجيون ني پي هيلو ڪرايو. <sup>17</sup> پڇي اُونون اُوئي ني بيگڻائي رنگ رو بادشاهي جبو پيرايو هان ڪونٽون رو تاج نائي اُوئي ري مائي تي راکيو. <sup>18</sup> پڇي اُوئي ني نمسڪار ڪري ڪيوڻ لاگا ڪم، ”اي يهوديون را بادشاه نمسڪار.“ <sup>19</sup> پڇي او اُوئي ري مائي تي سر ري گيڏي هڻ لاگا، ٽوڪڻ لاگا هان گوڏا ڪوڙي نمسڪار ڪرڻ لاگا. <sup>20</sup> جڏي اُونون پريو يسوع تي نٺولي ڪري هڻو ڪيو، تو پڇي اُونون بيگڻائي رنگ رو بادشاهي جبو اُتاريو هان اُوئي را گايا اُوئي ني پاڇا پيرايو. پڇي او پريو يسوع ني شولي تي چاڙهي مارڻ ري شارو باهر لي گيا.

### پريو يسوع ني شولي تي چاڙهڻ

(متي 27:32-44؛ لوقا 23:26-43؛ يوحنا 19:17-27)

<sup>21</sup> جڏي او جاوتا پڙيا، تو اُونون ني ڪرين شهر رو هيڪ منڪ پڙو هويو جڪي رو نون شمعون هتو. او سڪندر هان زوفس رو باب هتو. او باهراڙي شون يروشلم شهر ڏيما آتو پڙيو. فوجيون اُوئي ني ونگار ۾ جهاليو ڪ او پريو يسوع ري شولي ڪئي بي. <sup>22</sup> پڇي فوجي پريو يسوع ني گلگنا نون ري جگها تي لي گيا. (گلگنا رو مطلب هي، ”ڪوپڙي ري جگها.“) <sup>23</sup> اُونون پريو يسوع ني پيٺڻ ري شارو انگورون رو رس ڏينو جڪي ۾ مر نون رو نشو ملايوڙو هتو، پڻ اُوئي او ڪونهي پيئو. <sup>24</sup> پڇي فوجيون پريو يسوع ني شولي تي چاڙهي ڪوڪا هڻيا هان اُوئي را گايا آيت ۾ بلاون ري شارو پکا گهاتيا. <sup>25</sup> جڏي فوجيون پريو يسوع ني شولي تي چاڙهيو هتو، او تيم اندازن ساڪلي پور رو نٺو رو تيم هتو. <sup>26</sup> اُونون شولي مائي هيڪي تڪتي تي اي ڏوه لڪي لگايو ڪم، ”اي يهوديون رو بادشاه هي.“ <sup>27</sup> اُونون پريو يسوع پڙو پيئون ڌاڙيلون ني پي شولي تي موت ري سزا ڏيني هتي، هيڪ اُوئي ري شاجي هان بيجو ڪاڻي پاشي هتو. <sup>28</sup> [ايئي نموني شاستر ري او بات پوري هوي ڪم،

”منڪون اُوئي ني ڏوهي آئي ڪار سمجهو.“]

29 اوت شون لنگهڻ آلا منڪ ڪوندا لوڏي پريو يسوع زي خلاف نٺولي ڪري ڪيتا ڪم، ”واھ، اي ايشور زي گهر ني ٻڪورڻ هان تينون ڏنون ۾ ناوڻ آلا، 30 همي شولي شون اُتري بتا هان آبي بچا.“

31 ايئي نموني ايشور را مونا پوجاري هان ڌرمي گرو پي اوني تي نٺولي ڪري آبت ۾ ڪيتا ڪم، ”ايئي بيجون ني بچايا هي، پڻ همي آبرو آبي ڪيون ڪونهي بچاوتو. 32 جي آي شاجيلي اسرائيلي قوم رو بادشاه هان مسيح هي، تو هتون رو هتون شولي شون هيٺو اُتري آوي، تو مهني پي آي جوئي وشواس راڪون.“ پچي جڪو اوني پيڙا شوليون تي چاڙهيوڙا هتا، او پي اوني ني تونا ڏيوڻ لاگا.

### پريو يسوع ري موت

(متي 27:45-56؛ لوقا 23:44-49؛ يوحنا 19:28-30)

33 پچي ڏن رو اندازن ٻارهون شون لي تيني بجي توڻي شجي مُلڪ ۾ اندارو هوئي گيو. 34 پچي اندازن تيني بجي پريو يسوع زور شون ڪهيو ڪم، ”ايلي، ايلي، لماشقتني؟“ جڪي رو مطلب هي، ”اي مهارا ايشور، اي مهارا ايشور، تي مهني ڪيون چوڙيو هي؟“ 35 آي شطي اوت ايوڙا ڪينڪه منڪ ڪيوڻ لاگا ڪم، ”شوم آي ايلياھ نبي ني هिला ڪري پڙيو.“ 36 پچي هيڪي منڪ ناشي جائي فوم آلي ڪار هيڪ شطي لي هان اوني ني انگورون ري ڪئي رس ۾ هوڙي. پچي لڪڙي تي بونڌي پريو يسوع ني پيڻڻ ري شارو ڏينو هان منڪون ني ڪيوڻ لاگا ڪم، ”ٿوڙا ايو، جوئون ڪه ايلياھ نبي ايئي ني شولي شون اُتارڻ آوي هي، جون نا.“ 37 پچي پريو يسوع زور شون رڙ ڪري دم ڏينو. 38 تو ايشور زي گهر رو پڙو ماڻي شون لي هيٺا توڻي ڦاتي بي ٺڪڙا هوئي گيو. 39 صوبيدار جڪو پريو يسوع ري شومهو ايو هتو جڏي اوني پريو يسوع ني ايئون مرتي ڏينوم، تو ڪهيو ڪم، ”بيشڪ آي ايشور رو ڏيڪرو هتو.“ 40 اوت تموم گهڻي لڳائي الگي پون شون جوڙي پڙي. ائون ۾ مريم مگدلينني، نني يعقوب هان يوسيس ري ما مريم هان سلومي هتي. 41 او گليل صوبي شون اوني ري شيوا ڪرتي اوني لاري آي هتي. ائون شون ٽال بيچي لڳائي پي هتي جڪو يروشلم شهر ۾ آيوڙي هتي.

### پريو يسوع ني مڪوم ۾ راڪڻ

(متي 27:57-61؛ لوقا 23:50-56؛ يوحنا 19:38-42)

42 شام هوئي هان او پوپتر ڏن شون پيل تياري ري شام هتي. 43 تو ارمتيا شهر رو ريوڻ آلو هيڪ منڪ ايو، جڪي رو نون يوسف هتو. او يهوديون ري ڌرمي پنچائيت ۾ عزت آلو منڪ هتو هان او ايشور ري بادشاهي ري انتظار ۾ هتو. او دليري شون پلاطس ڪڍي گيو هان اوني شون پريو يسوع رو لاش مونگيو. 44 ايئي تي پلاطس حبرون هتو ڪه او ايترو بيگو ڪيڪر مٿو. اوني هيڪي صوبيدار ني اٿائي پوچو ڪم، ”يسوع ڪي تي مٿو هتو؟“ 45 صوبيدار شون پوچڻ شون پچي اوني يوسف ني لاش لي جاوڻ ري موڪل ڏيني. 46 پچي يوسف قيمتي شوتي گاپو مول ليئو هان لاش ني

شُولِي شون اُتاري اُوئي نِي كوقڻ ڏينو. پڇي اُوئي نِي هيڪي مُڪوم ۾ جڪو جبل ۾ ڪوتريوڙي چُر هتي راکيو. پڇي هيڪ مونو پتر مُڪوم ري موڏي تي راکيو. <sup>47</sup> اُوئي تيم مريم مگدلينِي هان يوسيس ري ما مريم جوتي پڙي ڪه پريو يسوع ني ڪيت راکيو هي.

### پريو يسوع رو جي اُنڻ

(متي 8-1:28؛ لوقا 12-1:24؛ يوحنا 10-1:20)

**16** <sup>1</sup> جڏي پويتر ڏن پورو هويوم، تو مريم مگدلينِي، يعقوب ري ما مريم هان سلومي، سُري شيون مول ليني ڪه جائي پريو يسوع ري لاش تي لگاوي. <sup>2</sup> او آچر ري ڏن ساڪلي تارهي ڏن اگني بلا مُڪوم ڏيشا گئي. <sup>3</sup> او مارگ ۾ آيت ۾ باتون ڪرڻ لاگي ڪه، ”آپني سارو مُڪوم ري موڏي تي راکيوڙو پتر ڪڍڻ الگو ڪرشي؟“ <sup>4</sup> ڪيونڪه او پتر مونو پتر هتو. پڻ جڏي اُونون جائي ڏينو ڪه پتر تو هتيو پڙيو هي. <sup>5</sup> جڏي او مُڪوم ۾ گئي، تو هيڪي جوان ني آچا چمڪيلا گايا پيريوڙا ساجي پاشي پينوڙو ڏينو. اُوئي ني ڏيڪي تموم گهڻي حيرون هوني. <sup>6</sup> اُوئي اُونون ني ڪهيو ڪه، ”تي اتري حيرون ڪيئون هو. ڪي تي يسوع ناصرِي ني جوئو هوم جڪي ني شولي تي چاڙهيو هتو؟ او تو جيتو هويو رو هان او ايت هائي ڪونهي. جوئو، آي او جگها هي جيت اُونون اُوئي رو لاش راکيو هتو. <sup>7</sup> همي تي جائي بطرس هان بيچي چيلون ني شٽائو ڪه پريو يسوع ٿون شون پيل گليل صوبي ڏيشا جاشي. او ت تي اُوئي ني ڏيڪشوم، جون اُوئي آپ ٿوني شٽايو هتو.“ <sup>8</sup> تو او لگائي مُڪوم شون نڪري نائي، ڪيونڪه او پي ري ڪري ڏڪتي پڙي هان حيرون هتي ايني ري ڪري اُونون مارگ ۾ ڪيني پي ڪونهي شٽايو.

### پريو يسوع رو مريم مگدلينِي ني درشن

(متي 10-9:28؛ يوحنا 18-11:20)

<sup>9</sup> [پريو يسوع آچر رو ساڪلي تارهي جيتو هوڻڻ شون پڇي سجون شون پيل مريم مگدلينِي ني درشن ڏينوم، جڪي شون اُوئي شات پوت ڪاڍيا هتا. <sup>10</sup> مريم مگدلينِي جائي پريو يسوع ري ساٿيون ني شٽايو جڪو ڏڪ ري ڪري روتا پڙيا. <sup>11</sup> جڏي اُونون شٽيو ڪه پريو يسوع جيتو هويو هي هان اُوئي مريم مگدلينِي ني درشن ڏينو هي، تو پي اُونون ايني بات رو وشواس ڪونهي ڪيو.

### پريو يسوع رو بيئون چيلون ني درشن

(لوقا 35-13:24)

<sup>12</sup> اُوئي شون پڇي پريو يسوع بيچي رُوب ۾ بيئون چيلون ني درشن ڏينو جڪو گون ڏيشا پنڊ جاوتا پڙيا. <sup>13</sup> اُونون پاچو جائي يروشلم شهر ۾ بيجون منڪون ني شٽايو، پڻ منڪون ايني بات رو وشواس ڪونهي ڪيو.

### پريو يسوع رو اڳياري چيلون ني درشن

(متي 20-16:28؛ لوقا 49-36:24؛ يوحنا 23-19:20؛ ڪوم 8-6:1)

<sup>14</sup> پڇي پريو يسوع اڳياري چيلون ني اوئي تيم درشن ڏينو جڏي او پيشي ٻاتي کاوتا پڙيا. پريو يسوع اوئون ني دڙڪا ڏينا ڪيونڪه اوئون را من ڪانا هوئي ڳيا هتا هان اوئون وشواس ڪونهي ڪيئو هتو، پڻ اوئون رو پي وشواس ڪونهي ڪيئو جڪون اوئي ني جيتو هوئڻ شون پڇي ڏينو هتو.

<sup>15</sup> پڇي پريو يسوع اوئون ني ڪهيو ڪه، ”تي سڄي دنيا ۾ جائو هان سڄي قومون ۾ مهاري نون ري خوشي ري خبر رو پرچار ڪرو.“ <sup>16</sup> جڪو وشواس راڪي پويتر سنون ليشي، تو اوئي ني مڱتي ملشي هان جڪو وشواس ڪونهي راڪي، تو او ڏوهي ڪيئو جاشي. <sup>17</sup> جڪو وشواس راڪشي او پرچا ڪرشي هان مهاري نون شون پوت ڪاڏشي هان او نوئي نوئي ٻولي ٻولشي. <sup>18</sup> جي او ناگ جهالشي، جي او زهر پيشي، تو اوئون ني ڪئين ڪونهي هوئي. او بيمارون تي هاڻ راڪشي، تو بيمار شاجا هوئي جاشي.“

### پريو يسوع رو آڪاش تي جاوڻ

(لوقا 53-50:24؛ ڪوم 11-9:1)

<sup>19</sup> جڏي پريو يسوع اوئون شون باتون ڪري هئو ڪيئو، تو پڇي او آڪاش ڏيئا ڪڍي ڳيو هان ايشور ري شاجي ٻاشي عزت هان اختيار شون جائن پينو. <sup>20</sup> ايني شون پڇي چيلا هر جگها جائن منڪون ۾ پرچار ڪرڻ لاڳا. پرميشور اوئون پيڙو پرچار ري ڪوم ۾ مدد ڪرتو رهيو هان اوئون شون پرچا بتائي ثابت ڪرتو رهيو ڪه اوئي ري ڪهيوڙي باتون شاجي هي. [